

Беҳзод
ФАЗЛИДДИН

Кутмаган

кунларим,
кутган кунларим



Беҳзод ФАЗЛИДДИН

ЎЗБЕК ИСТИҚЛОҚ
ЎҚУВ-ЎҚУТТИРИШ
ЎЎҚУВ-ЎҚУТТИРИШ

**КУТМАГАН
КУНЛАРИМ,
КУТГАН
КУНЛАРИМ**

Тошкент
«Akademnashr»
2012

УДК: 821.512.133-1
КБК 84(5У)7


Беҳзод Фазлиддиннинг ушбу янги китобини ўқиб, ҳаётнинг ўзи гўзал бир шеъркитоб, кутган – кутмаган кунларимизнинг бари сирга йўғрилган шеърлардир, деган ўй кўнглингиздан кечса, ажаб эмас. Шеър юрак ва руҳ, туйғу ила фикр осон топишган оний кайфият, ўз навбатида, узоқ тўлғонишлар маҳсули эканини китобдаги битиклар туғилган саналардан ҳам билса бўлади.

Сиз кўнгил ортидан эргашасизми ёки ақл йўлини танлайсиз? Эҳтимол, кучли ирода, собит эътиқод ёрдамида бу икки буюк кучни бирлаштира олиш мумкиндир? «Кутмаган кунларим, кутган кунларим» мутолааси давомида бу ҳақда ўзингиз бир хулосага келарсиз...

Азиз ва меҳрибон ота-онам, яқинларим,
қадрли устозларимга бағишлайман.

Масъул муҳаррир:

Маҳмуд САЪДИЙ



Китобда Ш.Турдимов чизган
суратлардан фойдаланилди.

ISBN 978-9943-389-38-0

© Беҳзод Фазлиддин
«Кутмаган кунларим, кутган кунларим»
© «Akademnashr» нашриёти, 2012 йил.

Дунё эски,
ташвишлар эски...



Ташқарига чиқдим. Юрагим қўлда.
(Бутун бир кўчани ёритарми шам!)
Бўлиши мумкин-ку худди шу йўлда
Умрида ёруғлик кўрмаган одам.

2008 йил 24 сентябрь



БС УЙҒОНИШ

Кўзларимдан оловлар сачрар,
 Қафасдаги шердай оғриндим.
 Хувиллаган одамзор ичра,
 Ҳаёт, Сени жуда соғиндим!

Кундалигим бир хил: уй, йўл, иш...
 Қаноти йўқ қушга ўхшайман.
 Ташвишларнинг ортида ташвиш...
 Бу туришда қачон яшайман?

Қайда эшик очдим ғавғога?
 Йўл бошида йўқотдим йўлни.
 Оз бўлса ҳам тоза ҳавога
 Олиб чиққим келар Кўнгилни.

Ёниб кетгим келади бирдан,
 Адо қилди тунга шериклик.
 Некбин-некбин нигоҳлар билан
 Бугун сенга зорман, Тириклик!..

Юрагимда орзугул унар,
 Умид тинмай қилар қўнғироқ.
 Борган сари кўзларим тинар –
 Борган сари Қуёш яқинроқ..

2008 йил 3 июль

УЗУН ОРЗУ

Бирдан қанот ўсиб чиқса елкамдан,
Учсам. Ҳаммасини унутсам. Кетсам.
Асар ҳам қолмаса шум кўланкамдан,
Армон етолмаган манзилга етсам.

Қувиб тутолмаса ортимдан лаъин,
Муҳаббат ўртада бўлмаса даллол.
Худди шу энг мақбул, тўғри йўлдаин –
Учишим ҳеч кимга келмаса малол.

2008 йил, ноябрь

БОЗОР

Бугун ҳам пул эмас, Нур излаб чикдим,
Нигоҳларим тоза – кўзимда кир йўқ.
Яна назари оч тўпга йўлиқдим,
Одамман деган кўп, юзида нур йўқ.

Қандай юрак очай юраксизларга,
Наҳот, шуларни деб тўкмоқчиман тер?
Ёрдам бергим келар маҳбус сўзларга,
Гаплар осмондадир, пойгакларда Шеър.

Яшаш ҳадисини билмасман, балки,
Инсонлик илмидан олурман таълим.
Ҳалолликдан сабоқ берарми ёки
Ўзи амал қилмас Ҳаётмуаллим?

Тошларни чайнашга темир тишим бор,
Чўкиб кетмасликка топарман қудрат.
Меншунослар билан нима ишим бор,
Бу йўлдан кўз юмиб ўтгум йўқ фақат...

2008 йил 25 июль

ЭСКИ ҲАҚИҚАТ

Дунё эски, ташвишлар эски,
Навқирондай бу ғамлар кўҳна.
Қарсақ чалиб топамиз таскин,
Ҳаёт ўзи эски бир саҳна.

Гар пихини ёрган фуқаро
Ўзлаштирмақ бўлар бугунни,
Ечолмаслар минг йиллар аро
Севги деган эски тугунни.

Ким бировни йиғлатиб кулар,
Шу ўйинлар менга қизиқми?
Ё ўчириб берарми улар
Пешонамда турган ёзуқни?

Фақат сира тинч қўймас бир ҳол,
Ўйлатади дунё ишлари:
Нигоҳлари маъюс мажнунтол,
Чинорларнинг хўрсинишлари...

2008 йил 6 июль

«УЧЛИК»ЛАРИМ

Сўқирнинг қўлига шам берма, дедим,
Ҳаёт кафғирига дам берма, дедим,
Мендан бошқасига ғам берма, дедим.

Соядай қадамим пойлайди Гуноҳ,
Мени ўзимдан кўп ўйлайди Гуноҳ,
Нимага яшашга қўймайди Гуноҳ?!

Товланишни бас қил, зарга оғмайман,
Шеър билан овутма, сўзга сиғмайман,
Мен йиғлай олмаслар учун йиғлайман.

2008 йил, июль

РОЛ

Қайси шамол қаддимни эгди?
Қачон булут тўсди офтобим?
Биров бўлиш жонимга тегди,
Ечиб отгум манфур ниқобим.

Бу курсижон, у телефонхон —
Кўриб қўйсин, мана, юзимни.
Тил учида сақлаб юрдим жон,
Ҳар қолипга солдим ўзимни.

Пуч сўз сотиб даромад қилдим,
Рандаланган гапларим силлиқ.
Кесакларга хушомад қилдим,
Деворларга айладим қуллуқ.

Юрагимни ёлғон ўқидим,
Ўз-ўзимга қилмадим инсоф.
Ишқсизларча чўпчак тўқидим,
Бахтлиман, деб уриб келдим лоф.

Бу жараён борар жар аён,
Кўзларимга тўлиб келар қум.
Ич-ичимда тинмас ғалаён,
Лабларимда аччиқ табассум.

Нима берар кичик танаффус?
Қўллар чапак чалиб толганлар.
Афсус, улар учун ҳам афсус...
Афсус, мени севиб қолганлар!

2008 йил 4 сентябрь

Нега асли гўзал эмас гўзаллик?
Вафосиз йилларда бор менинг қасдим.
Ҳаммамизга тақдир номукамаллик,
Бутун бўлганимда одам бўлмасдим.

Феълимдан ўпкалаб борар виждоним,
Кўзи очиқ кунлар мендан норози.
Ҳамон томиримга сиғмайди қоним,
Ўртада овора ҳаёт – тарози.

Гоҳида ҳақиқат билан қовушмас –
Сўзларимдан қўрқиб кетаман бирдан.
Ё учиб кетмайди, ё ерга тушмас,
Яшаб бўлмайди-да бу юрак билан!

2008 йил, май - июль

ЖАВОБ

Мени тушунмади тушунганларим,
Уларни тингладим, ўзимни тийдим.
Ишонмай қийнади ишонганларим,
Митти озорларни кечирдим-қўйдим.

Ёт сўзга беркитдим қулоқларимни,
Ҳақгўй кўзларимни атадим фаним.
Шамоли ўчирди чироқларимни,
Мендан кечиб кетди кечмаганларим.

Дўстлар, дўстларимга айтинг, шошмасин,
Арзонга учмасин сотмоқчи бўлса.
Хиёнатда ҳам майдалашмасин,
Каттароқ тош отсин отмоқчи бўлса!

2008 йил, май

ЗОВ

Бу жар билан келишиб бўлмас,
Ногоҳ тортиб кетар домига.
Қуш ҳайиқар, нур келиб қўнмас,
Қуёш қараб қўяр номига.

Иси келар дуду ноланинг,
Ўт-ўланлар нигоҳи сўниқ,
Қоядаги қонранг лоланинг
Шунданми ё, чеҳраси синиқ.

Юмалайди тошлар бетоқат,
Бирдан келган каби хўрлиги.
Кенглик берар қўнгилга бир қат
Сал нарида тоғлар борлиги...

2009 йил 12 июль

Шу бир парча Қуёш. Тупроқ. Ҳаво. Сув.
Яна нима керак бахтли бўлгани?
Нега бунча катта кетади Орзу?
Вақтнинг имкони йўқ қулоқ солгани.

Қанотлари ёниб ўйнар капалак,
Муваққат гўзаллик кун ўтмай бежон.
Юрак пештоқида ҳислар камалак,
Эрта-индин бошқа туйғулар меҳмон.

Мавҳум бўшлиқларга узанган қўллар,
Сароб сарҳадида кўринмас охир.
Зардоб йиғиб борар мажруҳ кўнгиллар,
Аҳволи оғир.

Балки, шу ташвишда кексайди Очун...
Ҳассаси неча бор йўқолар кўрнинг?
Буюк қарзимизни эслатиш учун
Силкиниб қўйгани етмасми Ернинг?

2008 йил, сентябрь

Қолган чақаларни эслагим йўқдир –
Чироқ бўлолмайди ортимда, ўлсам.
Фақат нур сўрадим, фақат нур йиғдим,
Фақат меҳр олдим, қарз олган бўлсам.

2010 йил 4 август

Қош қорайди, ўйчан қисқарди кўнлар,
Тағин не ташвишда кўнгли юпунлар?
Ҳали кул остида мудрар учқунлар,
Кутинг...

Бирдай ўтди ойнанинг икки ўн беши,
Кечанинг бугунга ўтмади тиши,
Азалнинг иши бу, абаднинг иши,
Кутинг...

Севмаса севмасин сиз якто билган,
Келмаса келмасин сизни қон қилган,
Кутган ҳам ҳақ эрур, ҳақдир кутилган,
Кутинг...

Ким кимни ўчирди хотирасидан,
Ким четлашди ишонч доирасидан,
Кимдир боқар кўнгил ойинасидан,
Кутинг...


Бу асрий лаҳзалар сизмайди сўзга,
Севги бир шарпадир, кўринмас кўзга,
Яхши биласиз-ку, чора йўқ ўзга,
Кутинг...

2009 йил 19 ноябрь

ДАВЛАТ

ТРИН ТУҚ

ИлдиЗларим



ЁРУҒ НИЯТ

Нафас ростлаб олай, имкон бер,
Бошқа шоир ёзмас, ёзмасам.
Юрагимни кўтарарми шеър?
Қалбдан чиққан ҳар сўзим – қасам.

Уйғотгувчи Сўз сўраб ўсдим,
Достон-достон бўлар ғам-ғуссам.
Маили, мени ўқима, дўстим,
Дарддан сўйлаб кўнглингни бузсам.

Қоғозсиз ҳам куним ўтарди –
Ер юзида қайси шоир тўқ?
Шуни билиб қалам кўтардим –
Ўлмаи туриб ташлаб кетиш йўқ.

Кулма дардим кучайган пайти,
Ким қўйибди бизга миннатни?
Юпатмоқчи эдим шеър айтиб
Кўнгли тўлиб кетган миллатни...

2008 йил 6 сентябрь

ДАЪВАТ

Нурсевар япроқлар муродга етгай,
Бир кун бу илдизлар Куёшга тутгай,
Сайёрамиз биздан оқибат кутгай,
Она Ер кўксидан дардлар терайлик.

Бешикдаги ботир – жажжи шаҳаншоҳ
Мисли Ўзбекистон – навқирон нигоҳ,
Бугун эмакласа, эртага подшоҳ,
Уни Одам қилиб улғайтирайлик.

Уфққа туташ бўлсин манзилларингиз,
Совимасин юракандирларингиз,
Эриб кетсин ғафлат занжирларингиз,
Уйқулар ортида уйғоқ турайлик.

Ватансиз улусга толеъ кулмайди,
Озодликдан ортиқ мерос бўлмайди,
Ватан йўқолмайди, Ватан ўлмайди,
Абадият сари юзни бурайлик.

Шу юртда топганинг ҳаловат бўлсин,
Эл десанг, сўзингда салобат бўлсин,
Ўзбекдўст, иймонинг саломат бўлсин,
Дунёнинг умрини узайтирайлик,
Ўзига ўзи бек Ватан берайлик.

2008 йил

ДОВОН

Шу халқ ўссин, шу юрт кўкарсин,
Изга тушиб кетар қолгани.
Бошин мангу баланд кўтарсин,
Олтин бўлсин тош деб олгани.

Омон ўтди йиллар захридан,
Туришлари мардона бўлди.
Ғаним эриб кетди меҳридан,
Оқибати афсона бўлди.

Бек боласин қадами шахдам,
Бағри бутун, илиги тўла.
Ғижинглаган тойчоқлари ҳам
Ёв дилига солар гўлғула.

Эндигина тонглар отганда,
Парчаланмас азалий тоқат.
У кунларга қиёс этганда,
Бу кунларнинг захмати – роҳат.

Юракларда бирдамлашайлик,
Суюгани етар қудрати.
Ўзимиздан баланд яшайлик –
Шу юрт ҳаққи, шу халқ ҳурмати.

2009 йил 1 сентябрь

ЎФИЛ

Дада, далангизга дард сочиб келдим,
 Яна машаққату заҳматлар Сизга.
 Белингиз оғриди, мен қочиб келдим,
 Қачон олиб бердим раҳматлар Сизга?

Ая, соғинчингиз сочи оқарди,
 Бормадим – кўпайиб кетди тўйларим.
 Шу ёшимда фақат севиш ёқарди,
 Сиздан кўра кўпроқ уни ўйладим.

Бошдан нима ўтди – билдирганим йўқ,
 Кимдир тўкаверди нур изларимга.
 Ўзимни-ку хафа қилдирганим йўқ,
 Озор бериб қўйдим азизларимга.

Майсалар, парёстиқ бўлинг бош қўйса,
 Чинорлар, Отамнинг ёнида юринг.
 Боласини ўйлаб юраги қуйса,
 Аччиққина қилиб чой дамлаб беринг.

Бу ташвишлар билан бўлмайди қариб,
 Мени кутиш учун келган оламга.
 Қўллари толмасин челақ кўтариб,
 Булутлар, сув ташиб туринг Онамга.

Дада, дардингизга бошман, биламан,
 Ая, тушларингиз бир кун келар ўнг.
 Ҳали юзингизни ёруғ қиламан,
 Одамшоир бўлиб борганимдан сўнг.

2008 йил 7 сентябрь

Эриб окди дийдамда қорлар,
Қаҳратонда кўкардим, Ота.
Бемор бўлдим – бўлдим бедорлар,
Қайтадан бош кўтардим, Ота.

Қаёқларга кетиб боряпман?
Тушгим келмас кипригингиздан.
Оғир-оғир ўтиб боряпман
Юрак – Сирот кўпригингиздан.

Катталарга экан-да қийин –
Айтолмайди бўлса ҳам дарди.
Бу оламда қаттиқдир ўйин,
Қабоғимда болалик қадри.

Мақсадларим беради таскин,
Дуоларга ишонмай нечун?
Мен жаннати бўлишим мумкин,
Сиздай отам борлиги учун.

Шеърларимни ўқинг беозор –
Маъносини тушуниб қўйманг.
Ўзимдан хўп бўлганман безор,
Мени менга ишониб қўйманг.

2009 йил, январь

ЁЛФОН

Илож йўқ, бошқа бир йўли йўқ,
Рост гапни ичимда асрайман.
Кўнглимнинг кўнглини қилиб тўқ,
Сен – буюк бахши, деб алдайман.

Кўчаси чанг қилди эгнимни,
Шу гаплар, оҳ, менинг тенгимми!
Умримга доғ сочган севгимни
Ҳаётим нақши, деб алдайман.

Ўзимга тинмай чоҳ қазарман,
Сал қолса, ақлимдан озарман,
Шу экан аввалу азалдан
Дунёнинг иши, деб алдайман.

«Аҳволинг тузукми, той болам,
Шоирим – орзуга бой болам».
Дардимни билмайсиз, жон онам –
Ҳаммаси яхши, деб алдайман.

2009 йил 30 - 31 июль

Дўстлар, менга бир дўстлик қилинг,
Телефоннинг камдир қуввати.
Онамдан ҳам ҳол сўраб қўйинг,
Салом айтинг дўстлик ҳурмати.

Ахир, мени у аёл туққан,
Комилаю салкам фаришта.
Бардошларда қалби чиниққан,
Меҳри билан умрим саришта.

Бир бошига нечта жони бор?
Сув ичгандай ютади азоб.
Бахтим тилаб юраги бедор,
Шодлигим-чун чекар изтироб.

Ой тўлишар, табассум қилса,
Дуо – олтин, бу сўзлар – олтин.
Етти кўча нарида бўлса,
Хушбўй келар ўзидан олдин.

Ғўрлигимдан зўр келса синов,
Айланаман нодон дўстига.
Қовоқ солиб қўйгани – сийлов,
Койишлари – бошим устига...

2008 йил 9 сентябрь

Онангнинг энига камзул бўлмаса
Ҳар дайди шамолдан асраб тургани,
Отангнинг қўлига омбур бўлмаса
Ёғочлардан нобоп мих суғургани,

Синглинга сарупо, сеп йиғилганда,
Фойдаси тегмаса чит кўйлакчалик,
Ташвишлар уканга зўрлик қилганда,
Ҳимоя этмаса бир билакчалик,

Лаббай, деб келмаса говларни ёриб,
Мунаввар тонгларга йўрғак бўлмаса,
Ғанимнинг кўзини ўймаса бориб,
Эгилган элингга тирғак бўлмаса...

Шу шеърни тўқимай турганинг яхши,
Ҳар сатри қонингдан ўтмагунича,
Шу шеърни ўқимай турганинг яхши,
Оламни хотиржам этмагунича...

2009 йил 22 декабрь

Онамнинг онаси ўтди, водариг,
Боладай ичиқар шўрлик ҳар куни.
Оҳ, билмай қолибман, сезмай қолибман
Онам ҳам мен каби болалигини.

2010 йил 26 октябрь

Гул каби сочилди мен гул тутганлар,
 Менга күз тикканлар ўйларимда йўқ,
 Мен юзга гардини тавоф этганлар
 Кўнглимнинг кўксига санчиб кетди ўқ,
 Гул каби сочилди мен гул тутганлар.

Изимга зорларни зор этдим баттар –
 Кўксимдан музларни аритмадилар.
 Ҳеч қўркмай умримни ҳадя этганлар
 Бир бор тушларига арзитмадилар.
 Изимга зорларни зор этдим баттар.

Ким эдим?.. Нимага айландим бугун?
 Саробга интилган дунёпарастман.
 Қўл етмас юлдузман бировлар учун,
 Севгимнинг қошида хасча эмасман.
 Ким эдим?.. Нимага айландим бугун?

2009 йил 15 декабрь

Армонқизнинг кўзи баттар сузуклашди,
 Шеърим ўқиб кимнинг ҳоли тузуклашди?
 Қалам тутиб қўлим фақат нозиклашди –
 Уйда ўтин ёрганларим яхши эди.

Дил безиллар бу бемаврид шамоллардан,
 Саволлардан қочиб бўлмас, саволлардан,
 Чарчадим-ай оғир-оғир хаёллардан –
 Кетмон чопиб ҳорганларим яхши эди.

Ўйлайверсанг, ўйдунёнинг ўйи битмас,
 Қўли узун ташвишларнинг тўйи битмас,
 Унда бобом бошлаб кетган ўйи битмас –
 Қишлоқда лой қорганларим яхши эди.

Тутам умрим тўлиб борар туманларга,
 Ёмонларга ўлим йўқми, ёмонларга?
 Ўзим билан борса келмас томонларга,
 Худо ҳаққи, борганларим яхши эди...

2011 йил, июль

ОЧИЛМАГАН МАКТУБ

Дада!

Ҳаммасини кўриб, билиб турибсиз –
 Чидаб бўлмайдиган феъл-атворим йўқ.
 Сал елкамни қисиб ўтсам, тийиксиз –
 Кесаклар бирлашиб дўқ уради, дўқ.

Мендан нима кетди – қўлимдан келар
 Замонсоз юзларга нур сўраб яшаш.
 Ҳар махлуқ устимдан кулмоқчи бўлар,
 Баъзан оғир ботар Одамга ўхшаш.

Омад ҳам беғараз йўқламас, ёху,
 Билиб туриб атай бой бердим нақдни.
 Керагидан кўпроқ имкон берди-ю,
 Ҳеч раво кўрмади энг зарур Бахтни.

Ўзимга ўзимни обдон талатиб,
 Томошаталаблар ўйин кутдилар.
 Аҳёнда бир қошиқ асал ялатиб,
 Ортидан косалаб оғу тутдилар.

Билмайман, не сабаб омондир бошим,
 Нега тарс ёрилиб кетмайди юрак?
 Кўзимда тош каби қотади ёшим,
 Дардимни ололмай сўзлар жонсарак.

Тушунгим келади, етмайди ақлим,
 Ҳеч эплай олмадим ишонтиришни.
 Биласиз, бурнимнинг учида жаҳлим,
 Сиз ҳам талаб қилманг тушунтиришни.

2009 йил, октябрь

МУСОФИР

Шеърларимнинг сочлари оппоқ,
Ўйчан сўзлар юзида ажин.
Боққин, ахир, Онажон, бир боқ,
Ўглинг нега бунчалар ғамгин?!

Балки, жуда эрта улғайди
Юрагимда гуллаб ётган дард.
Кўзларимда тунлар ухлайди,
Ҳалқа-ҳалқа ёшларимни арт.

Кечагина подшодай эдим,
Атрофимда минглар парвона.
Баридан воз кечиб мен энди
Бир сўққабош далли-девона.

Кун қариди, совиди чойинг,
Пахта гулли пиёланг маъюс.
Йиғмай менга тўшаган жойинг,
Дарвозадан ҳатлаб ўтди Куз.

Не кўйларга солмади Орзу...
Ногоҳ учиб борсам қошингга.
Оғушингга гўдақдай ол-у,
Меҳрлар бер мен бебошингга.

Ҳали жуда ёшсан, чироғим,
Армон сени йўқламайди, де.
Эркалаб айт: Ўйинқароғим,
Ўғил бола йиғламайди, де...

Дунё ҳақда ортиқ билгим йўқ,
 Ҳар не дедим, барчаси – бекор.
 Шоҳ бўлгим йўқ, шоир бўлгим йўқ,
 Бугун фақат боланг бўлгим бор.

2010 йил 14 сентябрь

Ҳали дунё сутдай оқ эди,
Боғлар яшил, осмон ложувард.
Қуёш ерга яқинроқ эди,
Ой юзида кўринмасди гард.

Тебранарди майсалар сокин,
Кўкдан ёғиб майин наволар.
Борлиқ узра Бахт эди ҳоким,
Жонга хузур тоза ҳаволар!..

Сезмай қолдим, қалб қандай қотди,
Қачон армон ёзолди куртак?
Тушларим ҳам ўзгариб кетди,
Энди бари олис бир эртақ.

Қани кунлар – менга аталган,
Лойларгами ё ботиб қўйдим?
Ҳар заррадан чирой ахтарган
Кўзларимни йўқотиб қўйдим...

2010 йил, июнь

Сабоғи тугамас мактабдир Хаёт,
Баъзида танаффус ўйнаб-кулгани.
Кеча парталарда Дийдор эди шод...
Ҳамма тарқаб кетди Одам бўлгани.

Бир куни йўқ эдик, бирда бор эдик,
Тинмади Орзунинг хархашалари.
Жаннатда юргандай бахтиёр эдик
Бир ота-онанинг зумрашалари...

Қанча ёруғ бўлди умр – дарсхонам,
Билган-билмаганим шундан ҳам маълум.
Муаллим – Рухимни уйғотган Онам,
Фарзанд ажратмаган Отам – Муаллим.

Сўз бўлиб тилидан савоблар учган,
Икки олам аро қисмати – эъзоз.
Ким бўлиб борсам ҳам бағрини очган,
Келдим. Ассалому алайкум, Устоз!

2008 йил, сентябрь

ҲАВАС

*Ухламагим келяпти.
(Жиянимнинг хархашаси)*

Эркалангин, болажон,
Қанд-курс тўлсин қўйнингга.
Катта бўлсанг бир замон,
Ким ҳам қарар кўнглингга.

Майли, ётма, ухлама,
Ўйна ҳолдан тойгунча.
Тушиб қолмасин яна
Оғзингдаги мойкулча.

Қуйилмайди қариб ҳам,
Улар сендан баттар шўх.
Хафа бўлма, жиянчам,
Катталарнинг эси йўқ.

Текканида дам-бадам
Ташвишларнинг калтаги,
Сиз яхшисиз ҳаммадан,
Деб мени ҳам алдагин.

Кунларим эртак – хомуш,
Ишонмагим келяпти.
Болалик – энг ширин туш,
Ўйфонмагим келяпти.

2009 йил, июль

Бу қаро дард ёпишди қайдан,
Оппоқ ғамларимни соғиндим.
Кетгим келар гурбатсаройдан,
Покроқ дамларимни соғиндим.

Бардош оти ҳансираб борар,
Вужуд не деб алжираб борар?
Қароғларим қовжираб борар,
Чашми намларимни соғиндим.

Жон ипидан оташ яратган,
Ўзи нураб зиё таратган,
Довулларни эсанкиратган
Ўчмас шамларимни соғиндим.

Хилқат борми ундан нафисроқ,
Муҳаббатга бир оз хасисроқ,
Жондан яқин, жондан азизроқ
Аллакимларимни соғиндим.

2010 йил, февраль

Бошингизга Қуёш тож бўлсин, Ота,
Умрим қўлингизда ёруғ юлдуздир.
Баландроқ кўтаринг – чарақлаб кетай,
Мени ўртаётган чўнг азоб Сўздир.

Кўнглимда адашдим, ақлимда шошдим,
Дунё биёбонми тентирайдиган?
Жисмимда қайнадим, руҳимда тошдим,
Ҳеч вақо қолмади интиладиган.

Она, аллангизни айтинг қайтадан,
Навоси севгимга севгилар қўшсин.
Ишончлар уйғонсин, ёнсин жону тан,
Муҳаббат қудрати қонимда жўшсин.


Ахир, бошидаёқ юзни терс бурдим,
Бу кўча арзимас гангиб кетгани.
Дарё-дарё бўлди чашмаи зардим,
Денгиз йўқ бағрига сингиб кетгани.

Ой билан аҳд-паймон қилдим оидинда,
Бағримни суғордим кўз ёшим билан.
Ақлли деворлар турар олдинда,
Қаёққа бораман бир бошим билан?

Илдизларим, мени маҳкамроқ тутинг,
Учиш пайти келса, ўзим айтаман.
Фақат сиз тоқатда мендан-да ўтинг,
Дунёни уйғотар сўзим айтаман.

2009 йил 27 май

*Бир оз шошманг,
Вақт жаноблари!*



...чунки кўп нарсадан кўнглимни уздим,
чунки ҳафсаламни пир қилди ҳаёт.
чунки билиб-билмай ниятни буздим,
чунки еру кўқдан бўлмади нажот.

чунки ўзим билан келишолмадик,
жиндаккина ақлим эгмади бўйин.
имкон ила вақтни бўлишолмадик,
чунки ҳаммасининг мақсади – ўйин.

чунки изғиб юрар бунда қора рух,
баттар авж олдириб ҳазин оташни.
этимни чимчилар совуқ бир андух,
чунки истамадим осон яшашни...

чунки...

2009 йил 10 декабрь

ҲАР КУН

Шу лаҳзадан яшай бошлайман дейман,
Ичимдаги итнинг қулоқлари динг.
Ахир, алам қилар, кап-катта одам
Бир гугурт чўпича тегмаса нафинг.

Режаларим битмас, ишларим чала,
Билмаганга ҳазил, билганларга чин –
Ё йўлда машина бузилиб қолар,
Ёинки тугаган бўлади бензин.

Ҳар сафар, ҳар куни, ҳар доим шу ҳол:
Куттириб вақт ўтар, кутиб вақт ўтар.
Ёнимдаги дўстга ёрилиб кўрсам,
Шўрликнинг аҳволи мендан бешбадтар.

Бир лаҳзадан кейин борманми, йўқми,
Сафар олислигин эслатади йўл.
Қурол-яроғимни тайёрлаб турай,
Бу гал, ҳеч бўлмаса, эшик қоқиб кел.

2008 йил 17 ноябрь

ОСМОНДА ЁЗИЛГАН ШЕЪР

Еру осмон ораси – ҳаёт,
Сафаримнинг номи – алданиш.
Бунда менга ҳамма нарса ёт,
Бунда менга ҳаммаси таниш.

Ёпилмоқда илинж дарчаси,
Кўчишлардан бўлганман ҳориб.
Унутмоқчи эдим барчасин
Пўлат лочин бағрига кириб.

Бир ён булут, бир томон туман,
Қайга олиб қочай кўзимни?
Ҳар йўловчи нигоҳи билан
Тафтиш этдим яна ўзимни.

Учган сайин улғаяр ғуссам,
Хавотирнинг кўзлари лўқдир.
Бир он мизғиб олайин десам,
Осмонда ҳам ҳаловат йўқдир.

Тошкент – Москва – Берлин

2009 йил, сентябрь

МАНГУ ЛАҖЗА

Шу лаҗза кетмаса, шу лаҗза қолса
Ёки бирга кетсам үзим у билан.
Йўқолса, йўқолса, йўқлик йўқолса,
Мавхумлик кўйида бўларим бўлган.

Манзилга элтолмай мулзамдир йўллар,
На ном-у, на нишон, кездим бетиним.
Эслашга арзимас чалажон йиллар,
Шу лаҗза қошида топсайдим кўним...

2009 йил 1 февраль

Бир оз шошманг, Вақт жаноблари!
Икки оғиз гапим бор сизга.
Мангумиди изтироблари –
Отамерос кечикиш бизга.

Ҳар ҳикмати бир дунё Эгам
Қадрингизни тенгсиз яратмиш.
Замон, макон жilовини ҳам
Ўзидан сўнг сизга қаратмиш.

Бир чиройли ўйнаб юргандим
Болаларча, келтирмай ғашни.
Билмай қолдим, қачон ўргандим
Сизга тақлид қилиб яшашни.

Не азобни олдим бўйнимга,
Кунлар бошдан-охир эговли.
Бўй бермайди ўйлар ўйимга,
Ҳар қадамим ҳануз ўлчовли.

Ортингиздан чопганим-чопган,
Эртакмикан сизга тенг келиш.
Пушаймонга ким малҳам топган,
Тушимга ҳам кирмас энгилиш.

Бир кун ногоҳ йўқолиб қолсам,
Ҳайрон бўлманг излаб изларим.
Сизни катта йўлда хотиржам
Қутиб олар ёруғ сўзларим.

2009 йил 2 ноябрь

Ҳар куни кўксимда кўпқари,
Олишар чавандоз туйғулар –
Фирромга ўрганган кўплари.

Уялиб кетаман ўзимдан,
Тағинам гуноҳнинг ҳиди йўқ,
Кун қочиб боради изимдан.

Улуғ бир хатони бошладим,
Қаламнинг юргиси келмайди,
Шўрликни... синдириб ташладим...

2009 йил 7 март

Ортиқ ушлаб турмай, очик осмонга
Қўйиб юбораман юракни – шарни.
Аста сингиб кетар мовий майдонга,
Паналаб ўтгандай машўм хатарни.

Ҳеч ким ниқтамаса, ҳеч зог тегмаса,
Боладай ўйноқлар завққа берилиб.
Қўрқаман, кўкда ҳам озор чекмаса,
Ёрилиб кетмаса эди, ёрилиб...

2009 йил

Тонгдан эшигимни чертади ташвиш,
 Ичкарига олиб кирмасам, кўнмас.
 Ишда қандай ғалва қайраб турар тиш,
 Оёқ тортмайди-ю, бормасам бўлмас.

Йўлга отланаман, нонушта чала,
 Мўҳими – гупиллаб турибди юрак.
 Кутишга заррача йўқдир ҳафсала,
 (Барибир, автобус кутишим керак.)

Ишхонада ўша эски томоша,
 Ҳар кимнинг айтгани юзаки ўлан.
 Бахтиёр кўрсатгум ўзни ҳамиша
 Мийиғимда сохта табассум билан.

Ахир, ёлғон бўлса бўлар-да шунча,
 Не-не алдовларга, балки, соқийман.
 То устимдан кулиб қуёш ботгунча,
 Нуқул эртак ўқиб, эртак тўқийман...

Нега ҳамма нарса инсонга соя?
 Ҳар қулайлик дилни ғамга ўрайди.
 Борсам, ўтганмисан рўйхатдан дея
 Бахт ҳам юзи совуқ, ҳужжат сўрайди.

Саволлар тушда ҳам тинч қўймас нечун?
 Алаҳсираб тунни тонгга улайман.
 Эртага эркинроқ яшашим учун
 Тагин қанча жойга солиқ тўлайман?

Яхши беркилганми жўмракнинг оғзи,
Қўшнининг уйига ўтмабдими сув?
Кейин шундай ғалат ҳаёллар баҳси,
Ҳозир ҳаётимнинг бор маъноси – шу...

2010 йил 26 июнь

У ён ўтиб, бу ён ўтасиз,
Шошиб-пишиб қаён ўтасиз?
Токай шундай сарсон ўтасиз –
Яшаш керак, Беҳзод Фазлиддин.

Қилт этмайди, не тушса бошга,
Бор бўйича тимсол бардошга,
Ҳеч бўлмаса, бир харсангошга
Ўхшаш керак, Беҳзод Фазлиддин.

Ибрат билиб зебу зарларин,
Ҳикмат билиб зер-забарларин,
Дилга Ойнинг ҳарир нурларин
Тўшаш керак, Беҳзод Фазлиддин.

Нега шунча оҳ-вой ҳозирдан,
Қўлингиздан келмаса чиндан,
Ошиқликдай зўр лавозимдан
Бўшаш керак, Беҳзод Фазлиддин.

2010 йил

Мен сизгагина кутмаган кунларим
Кутмаган кунларим кутмаган кунларим
Кутмаган кунларим кутмаган кунларим
Кутмаган кунларим кутмаган кунларим

Не ҳикмат дилингнинг яролиғида,
Беадоқ тахайюл йўлига жим боқ.
Қутиш ва куттириш оралиғида
Йигирма йил ўтди – қолгани жумбоқ.

Нимадир етмади, яна, кимдир кам,
Балки, омадсизлик эди омадим.
Улгурса бўларди тозаришга ҳам,
Яшашни билдим-у, яшай олмадим.

Гоҳи уялтириб, гоҳи уялиб
Бирма-бир жон берди дақиқаларим.
Шунчалар ишондим, келдим суяниб –
Ҳаққа элтгаймикан ҳақиқатларим?

2009 йил 29 апрель

Ғам миршаби ҳар ерда нозир,
 Кўнгил тортиб борар жойим йўқ.
 Шуни ҳам кўп кўрмагин, ҳозир –
 Вақтдан бўлак ҳеч вақойим йўқ.

2010 йил, август

Сергак тортиб қоласан бирдан,
Салобати босар фикрнинг.
Илдизини излай бошлайсан
Ботинингда ғовлаган сирнинг.

Ахир, бундай бўлмайди яшаш,
Қун санаса бўлмас шунчаки.
Жовдираган Вақтнинг кўзига
Қандай қараш мумкин юзаки?

Борми бунда майдалашмаган,
Аслиятга содиқ қолган ким?
Сийму зарнинг сийналаридан
Нигоҳини асрай олган ким?

Қандай гўзал юксак-юксакда
Юлдузларга қўл бериб яшаш!
Лаш-лушларга ўралашмасдан
Ташвишларга чил бериб яшаш.

Шу мақомни ҳавас қилмаса,
Ўзинг билан уришгинг келар.
Ҳар нарсадан кечиб бўлса ҳам,
Шу орзуга эришгинг келар.

2009 йил, август

АНГЛАШ

Йилларим жам бўлиб Кунга айланди,
Ёлғонлар йиғилиб чинга айланди.
Бутунлик касб этди сочилган заррам,
Менларим бирлашиб МЕНга айланди...

2008 йил, сентябрь

ШАЛТНА

(Беморликда)

Яшайсан де, ўлмайсан деб айт,
Айтгин: Умринг кетмас шамолга.
Ахир, қуёш ботмоқда бу пайт,
Кун айланиб борар заволга.

Оҳ, қўрқаман, хавотирдаман,
Кўрганларим туш чиқмасми, деб.
Энди олам бўлганда чаман,
Икки қўлим бўш чиқмасми, деб.

Яшайвер де, севавер дегин,
Чекинмасин юракдан ғайрат.
Ишончимга куч-қудрат бергин,
Рух булбулин бетиним сайрат.

Ўтса ўтди, бўлса бўлгандир,
Не десам жон аччиқлигида.
Жуда бахтли бўлгим келганди
Кўзларимнинг очичлигида.

Яшайсан де, ўлмайсан деб айт,
Айтгин: Умринг кетмас шамолга.
Гарчи қуёш ботмоқда бу пайт,
Кун айланиб борар заволга...

2010 йил 15 август

ҮКИНЧ

Кечаги хаётим ёруғроқ эди,
Юрган йўлим чаман, боғу роғ эди,
Кўнглим осмон эди, кўнглим тоғ эди,
Воҳ, қандай кунларга йўл бериб қўйдим.

Энг нодир ҳисларга назар ташламай,
Наҳот, кўклам кетар бизни хушламай,
Кўксимда чечаклар яшнаб-яшнамай,
Мезоннинг қўлига қўл бериб қўйдим.

Қанча тентирасам, қанча югурсам,
Ортимдан боладай эргашар ғуссам,
Энди ўз тилимни топарман десам,
Армон шевасига тил бериб қўйдим.

Борини унутиб суйган ким мендек,
Надомат тўнини кийган ким мендек,
Бедиллар дастидан тўйган ким мендек,
Найлайки, дилсизга дил бериб қўйдим.

2010 йил 3 - 4 сентябрь

Адо қилди, еб қўйди йўллар
Ҳаётимнинг гулбаргларини.
Ҳаволарда муаллақ қўллар
Қайдан билсин дил дардларини?

Қасд қилгандай ўтиб борарман
Оғир-оғир қадамлар ташлаб.
Тупроқларга ботиб борарман
Қон талашган лабимни тишлаб.

Элас-элас кўзга ташланар
Олисларда милт-милт учкунча.
Қанча ўчиб-ёнди – ким билар –
Шу манзилда қўним топгунча.

Қайтгим бор-у, қайтмасман ортга,
Бу йўлларга болу ари – бир.
Ўзни олиб қочсам-да четга,
Кимларнидир ейди, барибир...

2010 йил 11 март

Бехуда чиқиллаб толиқди соат,
Лаҳзалар карвони бўлолмади жам.
Қиёфа жангидан чекинди сурат,
Ўзини кутишдан тўймади Одам.

Йиллар оқиб кетди – юзлари сўлғин,
Таъмини йўқотган туйғулар тахир.
Тонгни бедор кутди безовта, дилхун,
Илинжнинг ўлгиси келмайди, ахир.

Қадарда бориға қилмади зарда,
Сўзласа, сукутдан баланд сўзлади.
Ва лекин энг сўнги сонияларда
Илиниб қолмаса эди кўзлари...

2009 йил, январь

ЙИГИРМА ЕТИНЧИ БЕКАТ

Китобдай ўзимни варақлайман жим,
Нимагадир ташна, негадир муштоқ.
Қайси воқеликдан рангиндир умрим,
Қай ўринда дардим ишонарлироқ?

Сийқа сакталиклар этмасми мулзам,
Бахайр бўлармикан руҳий сафарим?
Биров ўқиганми мендан олдин ҳам –
Мунча ҳилвирайди саҳифаларим?!

Мана бу қўл изи, мана бу доғлар
Қайдан пайдо бўлди бугун бағримда?
Оҳ, наҳот, тарихга кўчди у чоғлар!
Хотирот ҳиди бор ҳар бир ҳарфимда.

Мавҳум эҳтирослар – бежиз ёнишлар,
Таъкидлар – қувончим ва ё оҳимдир.
Кўп нуқталар – узоқ иккиланишлар,
Сўроқлар – гумону иштибоҳимдир.

Нелардан сўйлайди бу сўзлар сози,
Зиммасига қандай аъмол ортилган?
Ўта таъсирчанми, мақбулми, баъзи –
Мисралар остига чизик тортилган...

Шукур, зерикмадим ўзимдан бир зум,
Ўқиндим. Қувондим. Ўртандим. Куйдим.
Холис баҳо берар дедим-у, ўзим –
Келажак қўлига топшириб қўйдим...

2010 йил 5 сентябрь

то ҳануз жумбоққа ўхшайди умрим,
то ҳануз улгуриб бўлмас яшашга,
то ҳануз кўзимда эзғиланар қум,
то ҳануз нўноқман ўзни асрашга.

наҳотки, ҳаёт шу, тириклик шудир,
наҳотки, умрбод ўртанмак – қисмат?
наҳотки, мўъжиза бўлмайди содир,
наҳотки, тоабд чўзилгай ҳижрат?

билмайман, бу бошда яна не савдо,
билмайман, не жиндир жонда рақс тушган.
билмайман, билишдан надир муддао,
билмайман, руҳ қуши қаёққа учган.

то ҳануз...

наҳотки...

билмайман...

2012 йил 12 январь

Кўксим узра ҳаво етиб улгурмайди,
Югураман, югураман – буюрмайди.
Ҳаловатдан масрур диллар ибрат сўйлар:
Қаноатни тутган ортиқ югурмайди.

Тенглашолмай тарихга не номлар ўчди,
Енгил елга енгилди-ю, шамлар ўчди.
Жондан азиз номин ёдга олган эдим,
Юрагимнинг хотиридан ғамлар ўчди.

Ўтган кунлар ўтиб бўлди – ўкинмайман,
Тўкилсам ҳам, ёнингизда тўкилмайман.
Ҳар найзаси юрагимни тоблаб борар,
Эгилмайман, букилмайман, чекинмайман!

2009 йил 26 апрель

Юраимнини ярми
қаерда?



НОМА

Настарин гуллари муштоқ хатимга...
Ёдингиз бағрида тунларим оқдир.
Қайси хизматимга, қай заҳматимга
Мени зулфингизга боғламиш тақдир?!
2008

Ғуборлар текизмай хаёлингизга,
Ҳаёни нарига қувмай севасиз.
Юрагимни тугиб рўмолингизга,
Сиз айтмай севасиз, «севмай» севасиз.

Бемаврид хатарни пайқаган қушдай,
Қаёққа беркинди туйғулар – инжа?
Хунобдир амалга ошмаган тушдай,
Ғумон кўксингизга сололмас панжа.

Кўнгил кўрғонига етказмас шикаст,
Парволар қилмайсиз ёмғирга, дўлга.
Куйдириб кетолмас – тафти жуда паст,
Сув сепиб қўясиз ҳижронли йўлга.

Улар севгим каби шаффоф, бетамая,
Юзга солмас олис гуноҳларимни –
Боғимга бегона хазон деб яна
Супуриб юборманг нигоҳларимни...

2008 йил, октябрь

Адашган Ишқ суратида елдим дайдиб,
Сендан бошқа кимга борсам, малол бўлдим.
Остонангдан мингинчи бор кетдим қайтиб,
Эшигингни очолмаган шамол бўлдим.

Чимдимгина нурни кимлар қисиндилар,
Кабутарлар қучоғимда исиндилар,
Мени ўйлаб йиллар оғир хўрсиндилар,
Ҳақиқатнинг ҳиди келган савол бўлдим.

Тоғлар аро кетолмадим кўнгил тусаб,
Бир нурчеҳра гул қидирдим – тоза насаб,
Элга дарддан кўп бежирим кўза ясаб,
Ўз бахтини яратмаган кулол бўлдим...

2008 йил, июль

Севги, о, гуноҳдошим,
Тўполончим, бебошим!
Юрагимга тош отдинг,
Синай деди бардошим.

Ҳеч гапимга кирмадинг,
Йўл бошладим – юрмадинг.
Ёш боладай ортингдан
Чопганимни кўрмадинг.

Гоҳ тирилдим, гоҳ ўлдим,
Гадо бўлдим, шоҳ бўлдим.
Эшитмадинг, шекилли,
Янгиланган оҳ бўлдим.

Ҳисларимни ўйнадинг,
Панд беришни қўймадинг.
Ўзинг уни кўрсатиб,
Яна мени қийнадинг.

Қилармисан тасаввур:
Ё муҳаббат, ё ғурур.
Бир сўз айтар севганим,
Минг йилгача чидаб тур.

2008 йил 12 сентябрь

Бундан буёғига бодомлар бедор,
 Бундан буёғига бутуқлар бежо.
 Балоғат бўйлаган боғларда баҳор,
 Бунчалар беқиёс, бунчалар барно!

Кела қол, новдалар қўймасин гуллаб,
 Яшнамоқ фаслини ўзинг бошлаб бер.
 Қадаминг тафтидан ёнсин ловуллаб,
 Интизор йўлларга нигоҳ ташлаб бер.

Бежиз лаб очишга ошиқма бир дам,
 Ҳали маврид келмас хайру хўшларга.
 Гулларга сабоқ бер вафо илмидан,
 Муҳаббат кўшиғин ўргат қушларга.

Бўйларинг атрига ғунчалар хумор,
 Нафасингни сезиб тонглар жилмайди.
 Оний табассуминг каби бетакрор
 Бу баҳор, бу баҳор қайтиб келмайди!

Кўзларим қаърига кўмилар олам,
 Дилни даста-даста ашъор қилган – Сен.
 Сен каби яшнашни билмайди кўклам,
 Кел энди, баҳорни баҳор қилган – Сен.

2010 йил, март - август

Кўзларимга ишон, қўлларингни бер,
Ахир, ғамларингни тугатмоқчиман.
Ўзим билмайман-у, лекин, барибир,
Мен сенга яшашни ўргатмоқчиман.

Кел, илми ушшоқни ўзлаштирайлик,
Бирга нажот топсин бу яримжонлар.
Орзунинг исмини ўзгартирайлик,
Имконлар навбатда турар, имконлар.

Кўнглингдан ўзгага қулоқ солмагин,
Чорла, безовта қил, тушларимга кир.
Аммо аро йўлда туриб олмагин,
Фақат кетмасингга мени ишонтир.

2008 йил, декабрь

Юракка айландим бошдан то охир –
Кўзим юрак бўлди, вужудим юрак.
Сурату сийратда улуғ Ишқ зоҳир,
Қолгани афсона, қолгани эртақ.

Қошимда япроқдай титради Дунё,
Қўлларим чўзаман – узилгиси йўқ,
Хазонга дўнишни истамайди ё
Бедиллар пойида эзилгиси йўқ.

Коинот самовий зийнат уфурар,
Яна кўзларимда жилваланди Нур.
Юрак эканимни эслатиб турар,
Шу ёруғ Дунёнинг борига шукур.

Юракка айланиб сирлашар оқшом,
Тим қора денгизда Оймома сузар.
Тошиб турар Офтоб – туйғу тўла жом,
Юракка ўралган ҳар нарса гўзал.

Тобора маҳкамроқ юмаман кўзни,
Барча дилсизликка бергандай барҳам.
Менинг юрагимга жо қилиб ўзни,
Юракка айланиб бормоқда олам...

2010 йил 2 август

Севги ёмон, севги дилозор,
Бор-будимдан мени айирди.
Андишасиз меҳмондай беор
Дил уйига сўроқсиз кирди.

Чехрасида жозиб табассум,
Бир чиройли ҳислардан ийдим.
Беихтиёр – билмасдан ўзим
Уй тўрига ўтқизиб қўйдим.

Эъозладим, бағримни очдим,
Хизматида бўлдим эрта-кеч.
Дастурхонга боримни сочдим,
Шунданмикан, кетгиси йўқ ҳеч.

Кундан-кунга бўлди яқинроқ,
(Ё мезбонни ёқтириб қолди.)
Хаёлимга ташлади қармоқ,
Мени буткул оғдириб олди.

Фуруримга кейин солди чанг,
Ўзлаштирди ичу сиртимни.
Ҳеч қанақа қўшинсиз – бежанг
Ишғол этди Кўнгил юртимни...

Энди нажот сўрайман кимдан?
Ё бўшатгим келмас майдонни.
Ҳайдолмайман ҳануз умримдан
Севги отли гўзал шайтонни...

2008 йил 26 июль

...
Кўрқмайсизми, тушингизга кирмай қўйсам,
Хаёлингиз билан суҳбат қурмай қўйсам,
Кўнглингизнинг кўчасида юрмай қўйсам,
Кўрқмайсизми?

Борлигимни биласиз-у, билмасдайсиз,
Зорлигимни биласиз-у, билмасдайсиз,
Муштоқсиз-у, лек назарга илмасдайсиз,
Билмасдайсиз.

Кунни тунга, тунни кунга айлантирдим,
Кўзларимни ўчмас унга айлантирдим,
Дил шўрликни бир мажнунга айлантирдим,
Ўйлантирдим.

Атиргулнинг япроғидан тикони кўп,
Яратганнинг биз билмаган ирфони кўп,
Омон бўлсак, яшамакнинг имкони кўп,
Имкони кўп...

2010 йил 28 октябрь

САС

Соя солмиш сабримга Соғинч,
Саратонда сенсиз совқотдим.
Соҳилларда сарғайди севинч,
Сирларимни сўзларга сотдим.

Сочинг силаб саболар сархуш,
Сезмайсанми, сездирмайсанми?
Савол сонсиз, ситамлар серпушт,
Севмайсанми, севдирмайсанми?..

2010 йил

КҮНГИЛ

Ҳеч бўлмаса, хафа бўлдим де,
Ё бўлмаса, бирор сўз айт, хой!
Фақат бундай қарама менга,
Кўзим тегиб синиб қолган Ой.

2008 йил, сентябрь

Сизни яратгандан мени қизғонманг,
 Келинг, ул яктони севайлик бирга.
 Беҳуда ўртанманг, бекорга ёнманг,
 Азиз умримизни ўрайлик нурга.

Борлигингиз – хаста руҳимга далда,
 Ҳамма суйган ёрдан рашк қилмак... Нега?
 Ахир, ўзингиз ҳам билмаган ҳолда
 Худони эслатиб турасиз менга.

Лойимни пишириб борар оловлар,
 Барча юлдузларга ўзим бошлиқман.
 Ҳушидан айрилиб суйса бировлар,
 Мен севиб ақлини топган ошиқман.

Бизни яратгандан мени қизғонманг,
 Ой ул ёр ишқида сархуш фалақда.
 Беҳуда ўртанманг, бекорга ёнманг,
 Асрайлик, асрайлик Уни юракда.

2007 йил 5 август

Мен – үзини сотиб күйган күл,
Хаёлимга занжир солиб бер.
Ўзингдан ўзгандан озод қил,
Юрагимни ундан олиб бер.

Осмон эдим, қандай эгилдим,
Қаро ерга дондай тўкилдим,
Наҳот, шунча осон енгилдим,
Юрагимни ундан олиб бер.

Қандай ишқ бу, йўлдан чалғитса,
Ўтдан олиб ўтга ирғитса,
Паришонман, яна тўзғитса...
Юрагимни ундан олиб бер.

Бир нигоҳга мендай зормас у,
Тоза дардга интизормас у,
Мени Сенга олиб бормас у,
Юрагимни Гулдан олиб бер.

2008 йил, май - июнь

СЕН

Биз икки соҳилда бирдай қийналдик,
Хумор кўзларингдан тўкилди олмос.
Энди қандай яшай – руҳимда ҳадик,
Сени кўрмасам ҳам, кўрсам ҳам бўлмас.

Кўксимда юлдуздай сўзлар асрадим
Бир куни бахтингни порлатадиган.
Севги – бўғзимдаги кўҳна ҳасратим
Кўнглимни самога ўрлатадиган.

Нима учун ёндим, авж олдим нега?
Дардим-ла дардингни олмоқчиман-ку!
Рухинг унутмасми мени эртага,
Сен билан Ҳақ сари бормоқчиман-ку!

2008 йил 6 июль

ФАЛАТИ ХОББИ

Мен унинг қалбига кирмадим ўйнаб,
Боқсам, кўзларидан ҳасрат ёғарди.
У лаззат оларди ўзини қийнаб –
Мендан хафа бўлиш унга ёқарди.

2008 йил, октябрь

Шу кеча эртагин тугатмаса қор,
Сен совуқ қотмасанг – уйга кирмасак,
Оқ, оппоқдан бўлак рангни билмасак,
Майлига, кечикса кечиксин баҳор.

Эртани ўйлама, чўчима сира,
Айни дам йиқилиб тушмасанг бўлди,
Қўлимдан маҳкамроқ ушласанг бўлди,
Ҳар босган изимиз биллур хотира.

Қумуш осмон гулдай сочар меҳрини,
Оҳиста чекиниб тун пардалари,
Юзингда порласа ой парчалари,
Қорлар ўчирилмас севгим муҳрини.

2008 йил 29 декабрь

СЭВДИМ

Кўзни юмиб севдим, севиб кўз очдим,
Кўҳна изтиробдан янги сўз очдим.
Бир Қуёш айланар қорачиғимда,
Оташин уфқларга қайта юз очдим.

Покиза гўдакдек жилмаяр дунё,
Севгимнинг кафтида улғаяр дунё.
Азондай беозор уйғотиб тонгни,
Муқаддас булоқда юз чаяр дунё.

Шамол қулоғимга шивирлайди шеър,
Юракка ҳамоҳанг энтикмоқда ер.
Мудраган оламга ҳайратлар сочиб,
Ошкор бўлаётир ўн саккиз ёш сир.

2009 йил 14 март

САВДОЙИ

Ҳаёл бир зум ҳаловат бермас,
Қарамасанг, на иложим бор?
Кўз қирингни ташлаб қўйсанг, бас,
Назарингга эҳтиёжим бор.

Қайси ошиқ иқболга ошно,
Кўнгил кўнгил кўйида бежо,
Ҳеч лаззатдан топмадим маъно,
Озорингга эҳтиёжим бор.

Ноқис севгим иззалар қилиб,
Ҳолим кўриб маз-залар қилиб,
Жигаримни жиззалар қилиб
Гузарингга эҳтиёжим бор.

Ҳар Зухроки, осмон талашган,
Ой не керак – ой ҳаммалашган,
Шафқат билмай жон савдолашган
Бозорингга эҳтиёжим бор.

2009 йил 13 август

Тушингизга кирганим учун,
Ёдингизда юрганим учун,
Сизни яхши кўрганим учун,
Худо мени асраса керак.

Дуонгизни айлаб ижобат,
Балолардан этиб ҳимоят,
Ажални-да қилиб хижолат,
Худо мени асраса керак.

Қандай масъуд бу ошиқ халқи,
Аршга бориб туташар шавқи,
Севилганим, севганим ҳаққи
Худо мени асраса керак.

2009 йил 26 август

Мен сизга бегона бўлмоқчи эдим,
Жой бергим йўқ эди ҳатто тушимдан.
Шундоқ ҳам ҳар нарса тиғиз дунёда
Ўй-ташвиш айирай дейди ҳушимдан.

Муттасил кимнидир ахтариб келдим,
Мўлтираб ҳар ёнга боқдим интизор.
Шу қадар девона яшарми эдим,
Башарти ўзимда бўлса ихтиёр.

Сиз-ку аллақачон кечар эдингиз
Ўртаниб, ўртаган ғариб Мажнундан.
Таассуф, ҳаммаси ҳал бўлиб бўлган
Кўзингиз кўзимда жилмайган кундан.

Шеър қилиб сочаман бутун дардимни,
Соғинсам, беркиниб оламан тунга.
Сиз хира хотирот аро гирёнсиз,
Ҳали ҳам бегона бўлолмай менга.

2009 йил 28 июль

АЧЧИҚ ХУЛОСА

Баҳорнинг йўлига кўз тутганим йўқ, –
Вафосизлар билан чапман-да.
Ҳали ўз-ўзимни унутганим йўқ,
Демак... ҳануз севолмабман-да.

2008 йил 24 октябрь



Ёлғиз-ёлғиз хаёллар сурдим,
Маломатнинг ҳиди ҳар ерда.
Тушларимда тентираб юрдим –
Юрагимнинг ярми қаерда?

Шовуллайди беором боғлар,
Ҳар япроқда ҳасрат гупурса.
Уваланиб кетарди тоғлар,
Бир азиз бош елкамда турса...

Азоб роҳат қилар қонимда,
Сингиб борар жонга нур тафти.
Учай дейман – йўқсан ёнимда,
Қайлардасан, қанотим жуфти?

2009 йил, апрель

Մտնորդս քեզանորդս անտեսով
 Օրհնելի քեզանորդս անտեսով
 Երբեքս քեզանորդս քր քրտնակով
 Երբեքս քեզանորդս քրտնակով

Մարտիրոս

Են ինչո՞ք քեզանորդս քեզանորդս
 Երբեքս քեզանորդս անտեսով
 Երբեքս քեզանորդս անտեսով
 Երբեքս քեզանորդս անտեսով

Մտնորդս քեզանորդս անտեսով
 Երբեքս քեզանորդս անտեսով
 Երբեքս քեզանորդս անտեսով
 Երբեքս քեզանորդս անտեսով



Нега ҳолинг паришон?
Нечун бошинг эгилган?
Қайдан келди бу туғён –
Юрак муштдай тугилган.

Гарчанд тақдир тўқинмас,
Ният безар аъмолни.
Ерни тепиш мумкинмас,
Сўкиб бўлмас шамолни.

Қўлда тутиб қол нақдни,
Бир чақадир қолгани.
Яхши-ёмон шу вақтни
Яшаб ўтсанг бўлгани.

2009 йил 27 февраль

АРАФА

Шамоллар тўхтади, суронлар тинди,
Оқара бошлади оламнинг ранги.
Борлиққа фусункор сукунат инди,
Тўкилиб бормоқда туйғулар занги.

Ўй суриб ўлтирар донишманд тоғлар,
Дов-дарахт ненидир сезгандай зийрак.
Нега ой юзида кўринмас доғлар?
Юлдузлар шивири нимадан дарак?

Мухаббат бир тараф, виқор бир тараф,
Оҳиста солланар гунчалар – барқут.
Сарак-сарак бўлиб сўзлар тортгай саф –
Қутлуғ бир айёмга кўрар тараддуд...

2009 йил, июнь

Бежиз ёмғир бўлганим йўқ-да,
Томчисида яна минг томчи.
Бир он ғубор ютишдан тўхта,
Дунё деган кекса алдамчи.

Кечаги кун – ёруғ хотира,
Боқий бўлар бугунги кунлар.
Ҳали ҳислар бордир бокира,
Куйла, куйла, қалб бўлиб куйла.

Тўкилгудай туйғулар тошар,
Тўлиб борар муҳаббат жоми.
Тазаррулар қилсак ярашар –
Бизникидир поклик айёми.

Бежиз ёмғир бўлмадим, ахир,
Дил ойнасин бир артгим келди.
Англамоқчи бўлдим ненидир,
Ниманидир эслатгим келди...

2011 йил 4 февраль

Бир лаҳза ҳолимга қўймади ўйлар,
 Босиб келаверди – тошлари оғир.
 Кўксимни куйдирди мукамбар куйлар,
 Бурда-бурда бўлди бир бурда бағир.

Бўйнимда соғинчнинг гўзал сиртмоғи,
 Ҳаддан ортиқ севиб ҳаддимдан ошдим.
 Ўпкамни қўлтиқлаб югурган чоғим
 Шошган бўлсам фақат яшашга шошдим.

Раббимга айтганим бордир, бегумон,
 Гоҳ метин, гоҳ забун – бандалик шуми?!
 Мени қайга бошлаб кетмоқда ҳижрон,
 Ортимда йилларнинг қора қуйқуми.

Оёғим чалишар, эгим увишар,
 Сабаблар сабабин, кошки, билолсам.
 Ҳаммаси, ҳаммаси жойига тушар,
 Ишончнинг қўрида исиниб олсам...

2011 йил 14 - 16 январь

Жаноза ўқилди қанча сатримга,
Не-не ҳисларимни айладим қурбон.
Соғинчлар кафанлар бичди сабримга,
Ҳануз жон озурда, ҳамон дил сарсон.

Қайғулар оқарди, сарғайди қувонч,
Йилларнинг ҳукмига кўндим-кўнмадим.
Неча бора ўлиб-тирилди ишонч,
Ўзимга қонмадим, ўзга қонмадим.

Нима у, ҳеч қўймас ҳоли-жонимга,
Ҳаётимни остин-устун қилган не?
Ўлатдай ёпишган гирибонимга.
Умрим, азиз умрим кетмасми зое?

Очила қолсайди ул қулфи махзан,
Энг кескир сўзлар-ла ёрдим дилимни.
Мени кашф этаркан қайси бир лаҳза,
Қай аср тушунар экан тилимни?

2010 йил 4 август

ТАСКИНЛАР

Яхшиям, сўлишин билмайди гуллар,
Ҳали не бўлишин билмайди гуллар.
Бўлмаса, очилмай қўярди.

Хайрият, ҳозирча билмас барини –
Ҳаётнинг хурмача ҳунарларини.
Йўқса, дил сочилмай қўярди.

Минг шукур, сўзларни бўлмайди алдаб,
Акс ҳолда, шеъримиз фитнакор атаб,
Ҳақ бизни кечирмай қўярди.

2011 йил 16 ноябрь

Кимнинг ҳузури деб ким сарсон бўлди,
Биров биров билан андармон бўлди.
Тарози палласи тенг келмади ҳеч,
Ким қиммат талашди, ким арзон бўлди.

Дерларки, жангдан сўнг ботир кўпаяр,
Иш осон кўринса, шотир кўпаяр,
Атрофда дарди йўқ талабгор бўлса,
Майдонда хашаки шоир кўпаяр.

Не учун ҳолимга ачинмайди тил,
Эртанги сўроқдан чўчимайди тил?
Оғзимга қум солиб, жим турай дейман –
Бекордан-бекорга қичимайди тил.

2009 йил, май

Хар кимга ҳам насиб этмайдиган Бахт
Зарра нигоҳимга бўлганида зор,
Жавобимни кутиб пойлаб турса Вақт,
Барини рад этсам такрор ва такрор;

Мазлум кўзёшига қоқилмай деб бот,
Дорда юрган каби ҳушёр қадам-ла –
Кўлларимда лангар, сўрасам нажот,
Саодат тонгига элтса бу ғамлар.

Ногаҳон Рух қуши тилга кирганда,
Асли ким эканим туйқус англадим.
Сип-силлиқ кўчалар чорлаб турганда,
Мен шу бахтиқаро йўлни танладим.

Нечун чорлайверар сир тўла само?
Балки, кимдир бизга илҳақ кўкда ҳам.
Учиб кетгим келар юлдуздай, аммо
Ерда Одам танқис, бунда Одам кам.

Ҳамон имлайверар юлдузлар зимдан
Тангрининг беминнат назари ила –
Оёқ узгим келмас мушфиқ Заминдан,
Видолашгим йўқдир майсалар билан!

2011 йил 7 - 8 апрель

Ишингиз бўлмаса чекишдан бўлак,
Керагидан ортиқ бўлса вақтингиз.
Ҳавони заҳарлаб қилсангиз эрмак,
Ҳатто ўзингизга келмай раҳмингиз.

Қочинг, ҳалал берманг, бўшатинг йўлни,
Беҳуда бир нафас ортиқдир бу дам.
Биздайлар учун ҳам қон қилиб дилни,
Нажот сўраш учун кетмоқда Одам.

2010 йил 12 июль

Ўзингни яхши кўр, одамларни сев,
 Бехуда ўйлардан қизғон умрингни.
 Малакка айлансин ичингдаги дев,
 Қутқар кўксинг ичра гирён қумрингни.

Табассум тафтида чехрангни очгин,
 Тайинли сабаб йўқ аччиқлангани.
 Махзани меҳрингдан марварид сочгин,
 Ўзингга зиёндир қаттиқлашганинг.

Қаёққа йўл олар қалам – қаландар,
 Сен юрак йўлидан юришни ўргат.
 Жондан ўтиб кетса эски аламлар,
 Мардларча лаб тишлаб туришни ўргат.

Ишқ эрур тоабод кўнгил сайқали,
 Мухаббат – ишончдир, муҳаббат – иймон.
 Самандар руҳингни асра аввали,
 Кўксингда порлаган қуёшга ишон.

2012 йил 9 февраль

Алам қилмай қўйди ҳеч бири,
«Чик» дейди-ю, ўзи чиқмас Вақт.
Мен Ҳаётни борича суйдим,
Ҳар томонда, ҳар қадамда Бахт.

Озор санчмас юракка ортиқ,
Бу гулларнинг ифори ўзга.
Кечаги жўн, совуқ одамлар
Жуда иссиқ кўринар кўзга.

Аллақачон овутиб олдим
Кўнглимни(нг) шўр кўз ёшин артиб.
Ҳаммасини кечириб бўлдим
Ўзгалару ўзимдан тортиб.

Қандай ёвуз кучлар бор бунда,
Билмаганим яхши – билмадим.
Гўр мавсумдан розиман, шаксиз,
Хато қилиб хато қилмадим...

2009 йил, июнь

ТАЪБИР

Эртага бошқача нур экар қуёш –
Эртага ҳаммаёқ ёруғ бўлади.
Тўкилса, қувончдан тўкилар кўз ёш,
Еру кўк губордан фориг бўлади.

Армон бир доғ мисол йўқолар ўчиб,
Булутдай тарқалур диллардан қадар.
Омонлик тилайди бир-бирин қучиб
Чумолидан тортиб чаёнга қадар.

Туйғулар чашмида нурлар ранго-ранг,
Кўнглингни ёзасан киройиларга.
Чехранг очилади қай томон боқсанг,
Олам тўлиб кетар чиройлиларга.

Бахт қўшиқ куйлайди – ўктам овози,
Хуш садо тўлдириб келар самони.
Ҳамма тақдиридан миннатдор, рози,
Ажрата олмайсан шоҳу гадони...

2009 йил 16 декабрь

Китоб бўлганимда, сизга борардим,
Қизганмай тутардим варақларимни.
Уйингизга Қуёш олиб кирардим,
Тунлари ёқардим чироқларимни.

Чанг еб қурбон бўлди қанча бечора,
Тафаккур тақдири кимнинг дастида?
Жавонда ялтираб тургандан кўра,
Бахтлироқ бўлардим ёстик остида.

2008 йил

Занжирлар узилса, кишанлар синса,
Ортиқ юкинмасанг шу эски тосга.
Ўзлигин йўқотган руҳга файз инса,
Умрингни буркасанг боқий ихлосга.

Шояд, ўз номини унутса хаёл –
Ҳақиқатга дўнса бой тасаввурлар.
Дунёни муҳаббат айласа ишғол,
Замин чехрасидан ёғилса нурлар.

Қалб кўзин фикратга эш қилиб боқсанг,
Нигоҳингнинг ўзи улуг шеър бўлса.
Энг кўҳна ҳикматлар мағзини чақсанг,
Эҳсонга айланса, дил не дер бўлса.

Яшасанг, шу кўйи яшасанг мудом,
Ҳаёт китобида зарҳал битикдай.
Ўлим-да мард бўлса, қилмаса фирром,
Юрганга яраша юрсанг тирикдай...

2012 йил 8 февраль

ҲАЁТ

Гоҳо тоқат етмай ноз-фироғига,
Маъшукдай астойдил бўлсам-да хафа,
Жавоблар бермасам қўнғироғига,
Кўнглимни олиш-чун уринган дафъа.
Ўзимни кўзидан йироқ тутсам ҳам,
Аччиқ-аччиқ гаплар айтиб, камига,
У ҳақда тушкунроқ байтлар битсам ҳам,
Турфа хил таъналар тиркаб номига;

Кўнглимни сўраманг, асти сўраманг,
Мен уни, барибир, яхши кўраман!

2010 йил 3 ноябрь

ТУФИЛИШ

Тонгни алёр айтиб уйғотди булбул,
Оламга таралди тириклик иси.
Аста бош кўтарар чехраси гулгун
Қуёш – юлдузларнинг энг чиройлиси.

Ором олар бўлди, ниҳоят, Чўлпон,
Янги кун нафаси элитар бехос;
Кундузнинг бағрида яйрайди осмон,
Бугуннинг жамоли чиндан беқиёс.

Зулмат залворидан ўзни қутқазсанг,
Синалган созлари синмас саботнинг.
Ҳар тунни Юлдуздай порлаб ўтказсанг,
Муродбахш кунлари кўпдир ҳаётнинг.

2011 йил 24 август

Хар лаҳза тийилиш азобига банд,
Юрак – қафасдаги некбин орзуманд.
Зулмат мил тортишга чоғланар ҳарчанд,
Мудом шамси анвар кўзимга пайванд.

2010 йил 18 декабрь

Шавалло



?..

Йўқ, ҳали олдинда видо онлари,
Фақат бир қайрилиб ортимга боқдим.
Мени деб ёришди кимнинг тонглари,
Кимнинг қароғига шамчиरोқ ёқдим?

Йиртиб отмайдиган шеърларим борми?
Менга қарши гувоҳ бўлмасми сўзлар?
Ранжитганим йўқми қишни, баҳорни?
Рози кетдимикан меҳмон ёз, кузлар?

Бир куни Юрагим тилга кирганда,
Суйганим ўзимга бўлмасми зиён?
Кўзларим барини сотиб турганда,
Мени қутқаргани келарми Иймон?

Қандай бўлар экан ишонч меваси?
Эккан-тикканларим пушмон бермасми?
Оғир ботмасмикан қалбим шеваси?
Қаттиқроқ йўталиш исён эмасми?!

2008 йил, октябрь

Чиқиб кетса эди шу иблис қондан,
 Сўнг топа олмаса мангуга изим.
 Бир Ҳаёт бошласам ўшал ҳур ондан,
 Ўз олдимда шувут бўлмаса юзим.

Қайтадан тозарсам – севсам қайтадан,
 Чалғитмаса машъум хаёллар бир зум,
 Арш сари зиналар қўйсам тавбадан,
 Саодат асрини эслатса умрим...

2010 йил

Бу хатолар, аччиқ хатолар
Хузурингга очиб берди йўл,
Саволларга дуч келдим нуқул,
Юрагимда сассиз садолар.

Қанотларим куйиб пастладим –
Баланд уча олмас ёлғизлар,
Мудом йўқлик изимни излар,
Ўзгинамни Сенга асрадим.

Қўлда қолиб кетди дуолар –
Нима бўлди? Нима жин урди?
Кипригимга азоб ин қурди,
Энди мени дардлар даволар.

Яхшиямки, хатоларим бор,
Йўқса, мени суймасми эдинг,
Ёмғирларга тўймасми эдим...
Дийдор юрти бўлди тавбазор.

2008 йил, сентябрь

ТАВАЛЛО

Ҳар ким ўз қисмати қошида ёлғиз,
 Гарчи атрофимда дўстлар бор – холис,
 Улар уммондаги хас каби ожиз,
 Ўзингдан ўзгага айтар дардим йўқ.

Оғир бу йилларнинг тоши енгилми,
 Биров ечолмади тилсим севгимни,
 Учратмасанг, қайдан топай тенгимни,
 Ўзингдан ўзгага айтар дардим йўқ.

Умримни чўқилаб зоғлар алмашди,
 Йўқолиб-йўқолмай доғлар алмашди,
 Елкамдан тушолмай тоғлар алмашди,
 Ўзингдан ўзгага айтар дардим йўқ.

Ўйларим кишанда, кўнглим кишанда,
 Сўрадим – сўрашни қилмадим канда,
 Авлиё бўлса ҳам, бандаси банда,
 Ўзингдан ўзгага айтар дардим йўқ.

Савобу гуноҳда беқарордирман,
 Ажаб, шу ҳолимга сервиқордирман,
 Умидсизлик аро умидвордирман,
 Ўзингдан ўзгага айтар дардим йўқ!

2009 йил 5 август

Шу чиркин матоҳга борми учмаган?
Барининг онгига губор сачраган.
Бойликни кир қоғоз билан ўлчаган
Тўдага тескари боқишни ўргат.

Бу йўлда юзини йўқотган кўпдир,
Илдизу изини йўқотган кўпдир,
Энг керак сўзини йўқотган кўпдир,
Аларнинг сафидан чиқишни ўргат.

Дарёлар бағрига сиғмас жилғаман,
Бирда сокин эсам, бирда долғаман,
Лойқа ҳислар билан тағин булғамай –
Тубигача тиниқ оқишни ўргат.

Тошларнинг кўнглига бир бор қўл солсам,
Ранжима, қошинга пича кеч қолсам,
Адашиб-адашиб йўл топиб олсам,
Юракдан чанглари қоқишни ўргат.

2009 йил 10 май

ТАҚВО

Улар ўқтам, минг бор шижоатлироқ,
Кеча-кундуз қойим, қўлида тасбеҳ.
Яратганга мендан итоатлироқ,
Ҳар нега соатлаб изламас ташбеҳ.

Шамол шовқинидан бежоланмайди,
Тунлари дув-дув ёш тўккани билан.
Шохларин силкитиб ҳаволанмайди,
Кунда бир мўъжиза туккани билан.

Ҳар нечук, қисмати ойдин экан-да,
Ғудир пешонаси бунча ярақлар.
Бош эгиб ҳам ўсиш мумкин, дегандай,
Таъзим қилиб турар мулло дарахтлар.

2010 йил 9 сентябрь

ҚАЙТИШ

Тинч қўймайди саволлар – саркаш,
Кўксимга ўқ отгани-отган.
Бирор чора сўрасам, дил ғаш,
Оламлари сукутга ботган.

Йиғлаб борсам, хўнграб чиққайлар,
Табибларим ўзимдай хаста.
Бечораҳол, маъюс боққайлар,
Ҳаммасининг кўнгли шикаста.

Кимга айтиб, кимга ёлворсам,
Ўз ғамидан ортолган ким бор?
Этагидан тутай деб борсам,
Муршидимнинг ўзи пирга зор.

Сўраб-сўраб тилим толмади,
Қани бошим тўсар чўғирма?
Мени ҳеч ким қабул қилмади,
Энди Сен ҳам юзинг ўғирма...

2009 йил 28 апрель

Масжидга ўхшаса эди бу дунё,
Ишонч бирлаштирса одамиятни.
Оқибат дегани бўлмаса рўё,
Ҳеч кас йўқотмаса ор, ҳамиятни...

Ҳамма тарқалмоқда дилга бериб зеб,
Яна оташ олди юракда бир Чўғ.
Меҳримни эҳсондай улашайин деб,
Ташқарига чиқсам, пойабзалим йўқ.

2010 йил

Ортиқ жимиб бўлмас, йўқ жимиб бўлмас,
Шунча ютқизиққа кўз юмиб бўлмас,
Ахир, ғам ортидан ғам шимиб бўлмас,
Ё Ҳақ, Ҳақ сўраган қалбга нусрат бер.

Бу қандай шажардур, туб томон ўсган,
Ҳар куртак кўзини ғофиллик тўсган,
Бир уйғоқ сўз айтсанг нафаси қисган –
Элатга уйғониш учун қудрат бер.

Буюкларин бир-бир ташлайди ўрга,
Сафсата сотганни бошлайди тўрга,
Борини бой бермиш данғир-дунғурга,
Ўзинг бу саҳнага ўзга суврат бер.

Битмас яраларим буткул битқаргин,
Кўнглимдан ўтганин элга ўтқаргин,
Мени қавмим билан бирга қутқаргин,
Пешонамга бошқа ёруғ қисмат бер.

2010 йил, июнь

Бардош либосининг иплари тиғдан,
Амаллаб кийдингми, ечишдан не наф?
Кўзингни яширма кўнгли мунглуғдан,
Сева олиш шараф, севилиш шараф.

Дақёнусдан қолган бу даҳри дунда
Бир янги заррадай кўзга илинсам.
Муродим гуллари очилган кунда,
Не тонг, яшаш учун маҳкум қилинсам!

Сўнги нафасгача эшиklar очик,
Ўз ҳолидан ўзи гумонда гумон.
Наздимда, кўрмаган бу қадар Ошиқ,
Бир томчи Дийдорга фарқ бўлган жаҳон...

2008 йил, ноябрь

Юборсанг Ўзингнинг ёнинга юбор,
 Чақирсанг Ўзингнинг қошинга чақир.
 Кўзимдан ўтолмай саргашта гўбор,
 Номингни айтганга нажот бор, ахир.

Ёдинг-ла банди эт саркаш хаёлим,
 Бошқани ўйламай, бошқани демай.
 Соҳиби қудратим, Соҳибкамолим,
 Ўзгани Ўзингдай севдирма – севмай.

Қўрқаман ёлғондан, қўрқаман чиндан,
 Ҳаётбахш сўзларга тилимни бойла.
 Тазарру менадир, мағфират Сендан,
 Раҳм айла, раҳм айла, яна раҳм айла.

Манглайга Ошиқ деб дастхат битиб қўй,
 Тоабад дунёга ишқим тушмасин.
 Мухтожман, бундан-да мухтож этиб қўй –
 Ўзингдан бошқага ишим тушмасин.

Нуқтача бўлолмай қотдим қаршингда,
 Осий ҳисларимни буткул даф этгин.
 Вужудим бахшида, Рухим бахшида,
 Севгимни Севгингга мушарраф этгин.

2010 йил 10 август

ЧОРА

У қадар мураккаб эмасди дунё,
Унча ҳам қўрқинчли эмасди дардинг.
Тушуниш илмига тобинг йўқ, илло,
Барчасини ўзинг тўқиб чиқардинг.

Гар аслинг қародир, оқ бўлолмайсан,
Риё либосига ўранган билан.
Осмон бўлолмайсан, тоғ бўлолмайсан,
Бу ҳолда милён йил чиранган билан.

Ҳеч неъмат беҳикмат этилмас ато,
Нимага шамадир Ойнинг тўлгани?
Самодан бир назар керақдир, ҳатто,
Эшак бозорига даллол бўлгани.

Азалнинг тупроғи нақадар хушбўй!
Ўзинга ўзингдан шифо бер – тузал.
Қадамингдай майда қаричингни қўй,
Бошингни эгиб кўр, ҳаммаси гўзал!

2010 йил 13 октябрь

АҢСОН

Раҳматингми, заҳматингми бу –
Адо қилдим ўзимни ўзим.
Не-не қалбга йўл кўрсатди-ю,
Ўз-ўзимга ўтмади сўзим.

Чеклаб-чеклаб чарчадим ўзни,
Текис жойдан юрмадим атай.
Менга бергин ўша бир Сўзни,
Дунёдан кенг дунё яратай.

2010 йил 1 июль

На буғдой, на сомонман,
На яхши, на ёмонман,
На тутқун, на омонман,
Мен ким бўлдим, Мавлойим?

Кетгим ё қолгим келмас,
Овора бўлгим келмас,
Яшагим, ўлгим келмас,
Мен ким бўлдим, Мавлойим?

Кўкламимда хазонлар,
Мезонимда найсонлар,
Сукутимда туғёнлар,
Мен ким бўлдим, Мавлойим?

Мўмин кўзи оч бўлмас,
Томошага ўч бўлмас,
Орзулари пуч бўлмас,
Мен ким бўлдим, Мавлойим?!

2009 йил, сентябрь

Мен мингта, эҳтимол, ундан-да зиёд,
Ҳар кўзгу аксида турфа талқинман.
Қайси бир қиёфам буткул Сенга ёт,
Қайси қиёфамда Сенга яқинман?

2010 йил 30 июнь

Мухаббат дегани эҳсондир, асли,
Энг эзгу сўзларим элга садақа.
Мен Сенинг сир тўла севгингга таслим,
Ишқ ганжи олдида дунё бир чақа.

Юрагим ёришар ёдинг нуридан,
Ҳаётга қайтаман исмингни айтиб.
Хуш наво таралар дил танбуридан,
Севгимдан севгилар уйғонган пайти.

Билмасман, не тахлит тугайди байтим,
Тасаввурга сиғмас шеърим якуни.
Мен фақат кўнглимдан ўтганин айтдим,
Шакли оҳанрабо, Дарддир мазмуни...

2011 йил 9 сентябрь

Тасбеҳ айтаверсам, зикр этаверсам,
Ўдинга кўмилиб кетса баётим.
Берсангу бермасанг – шукр этаверсам,
Ибодатга дўнса бутун ҳаётим;

Ҳар гапим сўзларнинг сараси бўлса,
Катта кетмасам ҳам майдалашмасам.
Маконим маънолар ораси бўлса,
Дунё талашмасам, жоҳ талашмасам;

Мадор бериб турсанг, ҳолсизлатмасанг,
Юрак тўхтамаса севишдан бир он.
Ўзимга қўймасанг, ёлғизлатмасанг,
Сенинг дўстларинга дўст тутинса жон;

Буюк таскин ила кўнглим шодласанг,
Давлатманд айласанг қаноат билан.
Фақат, фақат Ўзинг мукофотласанг
Икки дунёга тенг Саодат билан...

2011 йил 24 ноябрь

Меҳрининг чашмига хўб чанқоқ севдим,
Ёлғиз У ягона, манам тоқ севдим,
Найлай, тоқатимдан ортиқроқ севдим,
Ҳолимни сўрмаса, ҳолим ёмондур.

Муроду мақсудим ҳосил қилгувчи,
Истаса, ажрига ноил қилгувчи,
Нури иймонимни комил қилгувчи
Ҳолимни сўрмаса, ҳолим ёмондур.

Шам янглиғ умримни ёрқинроқ қилиб,
Жавзосин жонларга салқинроқ қилиб,
Шоҳ томиримдан ҳам яқинроқ келиб
Ҳолимни сўрмаса, ҳолим ёмондур.

Ҳозирдир хуш-нохуш гумонимда У,
Барқарордир руҳи равонимда У,
Ишқ онлари менинг томонимда У,
Ҳолимни сўрмаса, ҳолим ёмондур.

2010 йил 22 сентябрь

Раҳматига ихлос айлаб заҳмат чексанг,
Оғриқларинг ҳаловатга айлансалар.
Дил боғига алвон-алвон гуллар эксанг,
Хушбўйлари салаватга айлансалар.

Марвариддай лаҳзаларни йиққанингда,
Уфқлар сари манзур-манзур боққанингда,
Камтарликнинг чўққисига чиққанингда,
Таъзимларинг салобатга айлансалар.

Ёлғиз Унинг ёди бирла ўйга чўмсанг,
Ёлғонларни қайтиб чиқмас жойга кўмсанг,
Ором чоғи кўзни кўрқмай, кўрқмай юмсанг –
Уйқуларинг ибодатга айлансалар.

Томирингда оқар ҳаёт нашидаси,
Ҳар қадаминг – тирикликнинг қасидаси,
Бир ўзгариб ғамнок дунё харитаси,
Андуҳлари саодатга айлансалар.

Тафаккурдан қанот боғлаб кўкка учсанг,
Сўнг юракнинг суханида гавҳар сочсанг,
Жумла жаҳон бахтин сўраб кафтинг очсанг –
Дуоларинг ижобатга айлансалар...

2010 йил 11 сентябрь

*** НАПАТ ***

Улардан ном сўраб қанча ялиндим,
 Ёддан чиқмас қилиб номлаб бер мени.
 Бўлиндим, мингга, юз мингга бўлиндим,
 Битта қиёфага жамлаб бер мени.

2009 йил 21 июль

Ким сўраганини билмай ўтди
 Ким сўраганини билмай ўтди
 Ким сўраганини билмай ўтди
 Ким сўраганини билмай ўтди

Билми сизни йиллар
 Билми сизни йиллар
 Билми сизни йиллар
 Билми сизни йиллар

Билми сизни йиллар
 Билми сизни йиллар
 Билми сизни йиллар
 Билми сизни йиллар

Билми сизни йиллар
 Билми сизни йиллар
 Билми сизни йиллар
 Билми сизни йиллар

2009 йил 21 июль

Ҳаддан ортиғини сўрамадим-ку,
Бежиз совурмайин кўзим нуруни.
Ўтиниб тиладим, аҳволим танг-у,
Фақат зарурини, энг зарурини.

Юзимгача тошиб чикди гуноҳлар,
Ночор қочиб юрдим турфа назардан.
Улканлашиб борар кўксимда доғлар,
Безорман, ўзимдан тамом безорман!

Яшашни ўргат, эй буюк Мураббий,
Новвотга айлантир юрак шўримни.
Бутун қилиб бергин хаёллар каби
Ҳар жойга сочилиб ётган умримни...

2011 йил 10 февраль

ИБРАТ

Гадосифат бойни ҳам,
 Денгиз ютган сойни ҳам,
 Игна кирган жойни ҳам
 Бир Зот кўриб турибди.

Эл ошаган ошларни,
 Ерни ўпган бошларни,
 Пинҳон-пинҳон ёшларни
 Бир Зот кўриб турибди.

Ким ортимдан отмиш ўқ,
 Ким соямга қилар дўқ,
 Адоватим, гинам йўқ –
 Бир Зот кўриб турибди.

Дилинг соғми ё бемор,
 Ичинг ичида не бор,
 Гарчи тўрт ёнинг девор,
 Бир Зот кўриб турибди.

Парда шитирлашидан
 Нега кўрқасан, эй, тан,
 Пардасиз нури билан
 Бир Зот кўриб турибди.

Беҳзод, гул эк изингга,
 Ҳазир бўлгин сўзингга,
 Ҳар не қилсанг – ўзингга,
 Бир Зот кўриб турибди.

2009 йил 26 июнь

МАЙЛ

Бу қандай бедодлик, бу қандай исён,
Ўз соям ўзимни ютаман дейди.
Менмас, ичимдаги махлук, Художон,
Дунёнинг тагига етаман дейди.

2009 йил 13 июль

Нечун жон шикаста, нечун рух беҳол,
Кўнглимнинг эғнида кир ридомиди?
Бировга заррача келтирмай малол,
Ё Худо, ё Худо, ё Худо дедим.

Тонглар отиб кетди сезиб-сездирмай,
Пешонамдан ўпиб тўймади Қуёш.
Мангулик боғидан бир гул уздирмай,
Ботиб бораверар кўксимга бир тош.

Агар тили бўлса, айтсин шу тупроқ,
Қандай қадам босдим, қанча юк бўлдим?
То йўлда эрурман, умидим уйғоқ,
Гарчи ҳоли афғор, бағри чок бўлдим.

Олам нурга тўлди, негадир ҳануз
Дилма-дил юрибман ёғду ахтариб.
Зулматда қўлимга ким тутар фонус,
Бегона боғлардан келган Бахт ғариб.

Дунёнинг эғнида кир ридомиди,
Нечун қалб безовта, нечун рух беҳол?
Ё Худо, ё Худо, ё Худо дедим,
Ўзимга заррача келтирмай малол.

2011 йил 22 - 23 апрель

Исён бўлиб исён эмасди бу ҳис,
Иймон бўлиб иймон эмасди бу ҳис,
Аммо сира тинчлик бермасди бу ҳис,
Паноҳингдан бошқа борар жой йўқдир.

Воҳким, маълумоти олий телбаман,
Осон енгиламан, осон енгаман,
Манов кўпикларга қандоқ сингаман,
Паноҳингдан бошқа борар жой йўқдир.

Тушуниб бўларми ҳаёт дарсини?
Адо этарманму фарзу қарзини?
Ким ғаразсиз тинглар юрак арзини?
Паноҳингдан бошқа борар жой йўқдир.

Такрор-такрор айтдим, дил ёриб айтдим,
Бош олиб кетдим-у, ёлвориб қайтдим,
Кул эт, ғазабингни келтирса байтим,
Паноҳингдан бошқа борар жой йўқдир.

Бир ёруғ дуога айланди умрим,
Нур бўлиб қошингга шайланди умрим,
Сўзингга, Ўзингга бойланди умрим,
Паноҳингдан бошқа борар жой йўқдир.

2010 йил 20 сентябрь

Кўксим оғригани-оғриган, ё Раб,
Юрак оҳ дегани-оҳ деган, ё Раб,
Виждон дўқлагани-дўқлаган, ё Раб,
Найлай?

Тийилмаган ҳислар, тийилган кўзлар,
Айтилмаган сўзлар, дейилган сўзлар,
Бўғзим қафасида бир булбул бўзлар,
Найлай?

Кимлар деб кимларга бошимни эгдим,
Жафолар устига жафолар чекдим,
О, ўзим ўзимнинг жонимга тегдим,
Найлай?

Олислаб боради орзу елкани,
Аламлар қилади бир хас эканинг,
Яшайман деганим – ўлдим деганим...
Найлай?!

2011 йил 16 март

Кечагина олам мисли жаннат эди,
Эвоҳ, нафас олишим ҳам санъат эди.
Туфроқ бўлган япроқлардан ҳикмат ўқиб,
Бошим эгиб туришларим савлат эди.

Парча-парча йиллар аро тўлғонаман,
Қачон қайта ўчмас бўлиб уйғонаман?
Не ажабким, бошқасига ройиш бермас,
Кўнглим гулин ўзимданам қизғонаман.

2011 йил

Бошга тушганини кўз кўрди яна,
Ҳаёт оз меҳрини соз кўрди яна,
Шўр эди пешонам, туз кўрди яна –
Бир ўзим биламан, бир Ўзи билар.

Кутдим, куттирганга билдирмай кутдим,
Бардошни ёнимдан жилдирмай кутдим,
Бошқасин хаёлга келтирмай кутдим –
Бир ўзим биламан, бир Ўзи билар.

Аёвсиз ёқамдан тутади бир дард,
Ичимдан ичимга ўтади бир дард,
Жонимда гуркираб ётади бир дард –
Бир ўзим биламан, бир Ўзи билар.

Дил уйи лаҳзада ёришар-кетар,
Унга борган қувонч мендан ҳам ўтар,
Севаман – яшашга шу асос етар –
Бир ўзим биламан, бир Ўзи билар.

2011 йил 4 март

СЎНГИ ВАЪДА

Ёруғ шеърлар ёзаман энди,
Сен ҳам фақат яхши тушлар кўр.
Мен иккинчи ўзимни енгдим,
Ҳеч нарса йўқ юрагимдан зўр.

Ўз измига тушар ҳаммаси,
Қор остида қолиб кетмас из.
Жинкўчада зулмат шарпаси,
Омон сақлар бизни Ишқимиз.

Ота, сизга ўхшолмайман деб,
Беркитмайман нурга хонамни.
Бу аҳволда яшолмайман деб,
Қўрқитмайман мушфиқ онамни.

Нима йўлдан урар бандани?
Айтганингдан четга жилмайман.
Тангрим, кечир мен арзандани,
Ортиқ Сенга исён қилмайман.

Ўз юртига ҳайдайман ғамни,
Йўқотишдан, тамом, кўркмайман.
Тополмаса агар кулбамни,
Ёруғликни ўзим йўқлайман.

2008 йил 2 август

Шамоллар абадий,
ёмғирлар мангу



ТОФИСТОН

Кўнглимнинг кўзида порлади ҳайрат,
Оллоҳ, бугун Сени тошда ҳам кўрдим!
Қоялар борлиққа берганда зийнат,
Булутга бошимни қўйиб улгурдим.

Кечир, тоғ қалбимни тоққа бурмабман,
Чорласа, бормабман, зангор кенгликлар.
Юксакка юксақдан боқиб кўрмабман,
Теграмда ялпайиб турмиш дўнгликлар.

Келдим. Бу софликдан хижолатдаман –
Озор топмасмикан нигоҳим тушса?
Лаззатга кўмилиб тасбеҳ айтарман,
Гар обид гиёҳлар сафига қўшса.

Зилол туйғуларда кўксимни чайдим,
Вужудга шавқ берди руҳий таҳорат.
Чўққилар бошида бир ҳикмат тўйдим:
Яратсанг, ҳар нени тоғ каби ярат.

Фақат бир ҳадикдан хаёлим тилка,
Йўлиқмасам эди бепарволикка.
Яшаб қолай десам, бу мағрур ўлка
Қабул қилармикан фуқароликка?

2009 йил 28 - 29 март

Бир муддатга китобингни ёп,
 Мавхумотдан нигоҳингни уз.
 Табиатнинг ўзи зўр китоб,
 Бугун унинг қаҳрамони – Куз.

Қара, асар топилмас бундай,
 Тебранади боғлар – руҳафзо.
 Неларнидир эсга олгандай,
 Энтикади заъфарон дунё.

Тура турсин эски кўзойнак,
 Боққин очиқ кўз билан бундоқ.
 Деразангга барг отган кузак
 Мунча маъюс, мунчалар қувноқ.

Ўйлатмасин ортиқ тартиби,
 Шундоғича олам мукаммал.
 Қўя тургин ҳаво таркибин,
 Тўйиб-тўйиб нафас ол аввал.

Қушлар келиб, қушлар қайтмоқда
 Билганича чалиб сурнайлар.
 Кимлар учун видо айтмоқда
 Тирикликка ташна тўрғайлар.

Ҳаёт шудир – қанча тежамай,
 Вақти-бевақт тўкилган хазон.
 Бор бўйича, бўяб-бежамай
 Тасвирлайди мусаввир Мезон...

2010 йил 31 октябрь

Шамоллар абадий, ёмғирлар мангу,
Биздан сўнг ҳам оппоқ қорлар қолади.
Шаксиз, яшайверар қувончу қайғу,
Изҳорлар, иқрорлар, зорлар қолади.

Минг йилларки, аслин ўзгартмас тоғлар,
Салобати ўша, виқори ўша.
Таровати сўнмас диловар боғлар –
Ҳануз тошқин ҳислар талпинган гўша.

Бехос такрор-такрор чорладим, чоғи,
Япроқлар тизилиб келди сўзимга.
Қобирғаси синган хазонлар охи
Оҳангдор ҳасратдек туюлмас кимга?

Шунчаки тақлидга ўхшарми бу ҳол –
Демангиз, бу фақат илҳом онлари.
Рухимда яшади шундай безавол
Ҳаёт деган шеърнинг қаҳрамонлари.

Шамоллар. Ёмғирлар. Дарёлар. Тоғлар...
Азал нафасини келтиргай абад.
Япроқлари оят ўқиган боғлар...
Табиат тилида илоҳий суҳбат.

2011 йил 22 ноябрь

ҚОРШЕЪР

Осмон бодроқ тўқди кун бўйи –
 Борлиқ қўйни тўла оппоқ дур.
 Табиатнинг бу кумуш тўйи
 Бўғотларга улашар ҳузур.

Кўпни кўрган оғочлар яна
 Елкасига олар бор юкни.
 Ҳали давом этар тантана –
 Асраш керак ҳар нозикликни.

Кекса мўри зерикмас чекиб,
 Лек ҳавони қилмас бемаза.
 Изғириннинг қалами тегиб
 Гулзор бўлиб кетди дераза.

«Оққуш бўлиб қанот ёзайлик!..»
 Хаёлларнинг йўқдир поёни.
 Ташқарига шошар гўзаллик
 Шарфга ўраб олиб ҳаёни.

Поклик чулғаб борар ҳар ерни,
 Оқлик инар далаю боққа.
 Аёзкотиб энг дилбар шеърни
 Доғ юқтирмай кўчирар оққа...

2008 йил 22 декабрь

Ахир, шу чоққача қаяқда эдинг,
Эй, кўҳна латофат, эй, инжа хилқат!
Юрак-юрагимни тўлдириб келдинг,
Кўзимга жо бўлди бир чимдим жаннат.

Тоғу тош, боғу роғ пешвоз йўлингга,
Дарахтлар саф тортмиш – қомати расо.
Узукдек ярашиб нозик қўлингга,
Ям-яшил нур сочар зумрадкўз дунё.

Яшнатиб манзурсан, яшнаб масрурсан,
Умримни тўлдирди муҳаббат куни.
Қанча гўзал бўлсанг, шу қадар хурсан,
Мен шундай озода руҳнинг мафтун!

Борлиқни қуршамиш илоҳий бир ҳис,
Эҳ, азал нафаси келган малика!
Не тонгки, бахтим бут, қувончим тўкис,
Ҳаётим уйғундай мукамалликка.

Тобора юксалар орзу кафтари,
Заминдан самога мужда илиниб.
Кўксимни қуёшга тутганим сари,
Тушуна боряпман олам тилини.

Юрак учмоққа шай қушга ўхшайди,
Куртақлар жилваси – энг гўзал ашъор.
Сен ҳам бир мўъжиза кўрсатгин, дейди
Дилга илҳом солган Буюк Ижодкор.

НАШИДА

Ушанда ҳам навбаҳор эди —
 Борлиқ зангор, дунё навқирон.
 Куртакларга гапим бор эди,
 Юрак тилга кирганда бийрон.

Яна ўрик шохлари сархуш,
 Гулоб тутар нимпушти, оппоқ.
 Кеча эди эгнида кумуш,
 Бугун зумрад тўн киймиш чорбоғ.

Бутоқлардан мўралар умид,
 Камол ваъда этар ғунчалар.
 Нимагадир бўлгандай шоҳид,
 Шаббода бир соҳир куй чалар.

Сочларини сувга таратиб
 Ўлтирибди мажнунтол шайдо.
 Ўз-ўзидан чирой яратиб
 Борган сари табиат зебо.

Кўкда рангин ҳислар жамулжам,
 Жилвасидан қамашади кўз.
 Пучмоқдаги сўнги қорни ҳам
 Эритади ҳадемай Наврўз!

2010 йил 14 март

Баҳор, юр, онамни борайлик йўқлаб,
 Ишон, яхши кўриб қоласан уни.
 Хушбўйлар сочилган қишлоқни алқа,
 Кўзингни ачитмас аёз тутуни.

Йўллар қадамингга муштоқ, мунтазир,
 Жилғаларни бунча соғинтирмасанг!
 Кўклам, кўкламлинг нимага арзир,
 Кўнгилга илиқлик олиб кирмасанг?

Уйғониш – саодат, тириклик – неъмат,
 Ариқлар бошини ялпизга ўра.
 Келаси йилгача дийдор ғанимат,
 Музтарин момодан бир бор ҳол сўра.

Ёмғирлар ёғиб бер, чанқоғи қонсин,
 Томоғи қақраган далалар бўлса.
 Варрақлар учириб кўзи қувонсин,
 Бола бўлолмаган болалар бўлса.

Ўтиб кўй навқирон нигоҳларидан,
 Кўнглини чўқтирма ўктам оғамнинг.
 Барака тўкилсин бармоқларидан,
 Кўлини сиқиб кўй деҳқон тоғамнинг.

Қалдирғоч кечикса, уйқуси қочган
 Синглимни паришон айлама, Баҳор.
 Сен ҳам ҳар меҳмонга бағрини очган
 Онажон элимни алдама, Баҳор!

2009 йил 14 март

Тўрт девор ораси ҳаёт эканми!
Ёриб чиққинг келар ногоҳ куч топиб,
Гурбат эшиқларин мангуга ёпиб,
Димоғинг чоғ этар Тириклик таъми.

Сен билган дунёга ўхшамас дунё,
Ложувард самода тенгсиз тароват,
Кўклам бўлиб кезар боқий назокат,
Бу кун бор умрингга татийди гўё.

Шу қадар яқиндир висолнинг йўли,
Ҳақиқат рангига уйғундир тушлар,
Лолалар кўзингни ёндира бошлар
Баҳорнинг оташин нигоҳи бўлиб.

Баҳор – бу юракка қайтиш дегани.

2011 йил 8 март

Уйғониш нақадар гўзалдир,
Тириклик лаззати беназир.
Созингнинг умрини узайтир,
Йўлингга ёғдулар мунтазир.

Қучоғин тўлдирмиш боғларга,
Бағритош эмасдир, бағритош.
Бир қара мўйсафид тоғларга,
То ҳануз боладай кўнгли ёш.

Сўқмоқлар абадий саволдир,
Қоялар – буюклик ошиғи.
Саболар ҳаётбахш наводир,
Жилғалар – муҳаббат қўшиғи.

Булутлар бўйнида арғимчоқ,
Турналар алқаган айём бу.
Қўлингдан келади яшамоқ,
Севгидай бебаҳо инъом бу.

Хаёлни қўй, оғир хаёлни,
Ярашмас, бемаврид ўртансанг.
О, юрак, билмайсан заволни,
Баҳорга ўхшашни ўргансанг.

2010 йил 17 - 23 март

КҮКТҮЙ

Қалдирғоч ўланлар айтиб қош қоқди,
Кўк тугун кўтариб келмоқда совчи.
Қаҳратон бағрига марварид тақди
Бинафша кўзидан тўкилган томчи.

Куртаклар кўп кутмай гуллаб қўйдилар,
Тошларнинг кўнглини топди майсалар.
Ҳадемай мушк сепар йўлга жийдалар,
Заминга қадалур заррин найзалар.

Тоғларнинг кўксидан сув оқар сизиб,
Адирлар эғнида алвон нимчаси.
Зангори либосда юрибди кезиб
Уйғонган ўлканинг қироличаси.

Қаердан шунча кўрк, шунча малоҳат!
Тонг – шабнам қуйилган кумуш пиёла.
Сурмали кўзларда шаффоф балоғат,
Не учун бу қадар қизарар лола?!

Жилғалар бўйига ёйилганда сеп,
Энтиккан хасни-да суяр экансан.
Дугонаси Бахтни олиб келар деб,
Баҳорга ишониб қўяр экансан.

2009 йил, март

Улар күздән йирок, күнгилга яқин,
 Мўҗиза яшринган япроқларига.
 Ҳавасинг ва жиндай Ҳасадинг келар
 Йўқолиб кетмаган титроқларига.

Чирой очиб аста бошин кўтарар,
 Сўнг гўзал бўлишга журъат қилгайдир.
 Агар еб қўймаса қўю қўзилар,
 Даштни бу чечаклар жаннат қилгайдир.

2009 йил 26 - 27 май

Н О Я Б Р Ъ

Ёмғир қуя бошлади бирдан,
Савалайди биллур қамчилар.
Панароққа қочгани билан,
Топиб олар йўлни томчилар.

Парво қилмас симёғоч хумпар,
Бошдан-оёқ хўл бўлган жикқа.
Рақсга тушар олтин япроқлар
Шитир-шитир – ёмғиркўшиққа.

Мўлтирайди бекатлар юпун,
Маъюс тортар ёлғиз хиёбон.
Ниманидир эслатиш учун
Гумбурлайди қоп-қора осмон.

Филдираклар шошар қирғоққа,
Дарё бўлиб оқмоқда йўллар.
Бу сафар ҳам қизил чироққа
Тоқат қилмас автомобиллар...

Шу баҳона ютмади заҳар –
Ёмғир ювиб кетди барини.
Ғуборлардан зериккан шаҳар
Чайиб олди кўйлақларини.

2008 йил 6 - 9 ноябрь

МОҲИЯТ

Баҳор, баҳор дейсиз, кўклам ҳам ўтар,
Ҳар он ваъда қилиб Бахт висолини.
Куни кеча эди дилбар, муаттар,
Турланган гулларнинг кўринг ҳолини.

Ана, олтин кўз ёш тўкар дарахтлар,
Зарҳал йўлақларда хаёл фаромуш.
Ортда қолиб кетди паймону аҳдлар,
Афсус чеккан каби бекатлар хомуш.

Неларни англатар ёмғир шитири?
Беқарор томчидай титрайди жонлар.
Сўнги лаҳзаларин яшаётир-у,
Абадий сабоққа дўнар хазонлар.

Бу ҳолни бошидан ўтказган билар,
Тушунгай ўзи-ла келган юзма-юз.
Ёмғиру шамоли, гоҳ қори билан
Ҳаёт эртагига мазмун берар Куз.

2011 йил 21 ноябрь

НО *** Ъ

TRIXOM

Уч кундан бери ёмғир –
 Гоҳ майин, гоҳи шаррос.
 Осмоннинг дарди оғир,
 Энтикар Замин – ҳассос.

Кўринмай қолди офтоб,
 (Майли, бир мизғиб олсин!)
 Юзин яширган моҳтоб,
 У ҳам тин ола қолсин.

Хуш ёқар намчил ҳаво,
 Кўлобланган томчилар.
 Энг шаффоф сўзлар гўё
 Бошинг узра сочилар.

Турфаланиб мароми,
 Ёғаверди кундуз, кеч.
 Жўш ургандек илҳоми,
 Тингиси келмади ҳеч...

Ёмғир – қувонч, оҳимми?
 Ором берар, ўйлатар;
 Бир аллалар руҳимни,
 Бир қонимни қайнатар...

2011 йил 24 ноябрь

ШАМОЛ

Яна найранг бошлади, чоғи,
Гулбаргларни силаб, сийпалаб.
Қўлларида темир тароғи –
Эрмакталаб, овунчоқталаб.

Кўнглинг олиб кетмасин, Гунчам,
Унга имкон яратиб қўйма.
Ўз бўйингга сархуш этса ҳам,
Сочларингни таратиб қўйма.

2010 йил 15 сентябрь

АСМАЛИ

Оққа буркаётир заминни само,
Биллурланиб борар заъфарон олам.
Паришон оқсочга ўхшайди шамол,
Кумуш тангаларни сочар хотиржам.

Раҳмат парчалари ёғиб дамодам,
Қаён борсам, аста ортимдан чопди.
Гўё фаришталар тушиб самодан,
Бошимни силади, юзимдан ўпди.

Йўқ, ҳозир бошқаси келмас қўлимдан,
Тўйиб тикиламан етиб васлига.
Беҳисоб мўъжиза ўнгу сўлимда,
Беқарор бу қалб ҳам қайтган аслига.

Йиғштириб қўйиб ҳамма нарсани,
Ўйладим, ўйларим ёруғлик бўлди.
Лаҳзага бехато улаб лаҳзани,
Сўраганим оқлик – улуғлик бўлди.

Воажаб, ҳаммаси кийинмиш бирдай,
Ёш-қари ўйларнинг бошида оқ бўрк.
Мени ҳайратларга тўйдирмоқчидай,
Кўзимга мўъжиза тўкаверди кўк...

2011 йил 28 - 30 ноябрь

АЁЗ

Аччиқ совуқ, жимирлар этинг,
(Кўпни кўпга қўшмас забунлик.)
Қотиб қолар бир зум саботинг,
Жондан ўтиб кетгач юпунлик.

Олислардан келгандинг оқиб,
Яшамоқчи эдинг одамдай.
Жовдирайсан офтобга боқиб
Бевақт гулга кирган бодомдай.

Омонатни омон етқарсанг,
Икки дунё ёруғдир юзинг.
Тўқсонини шуйтиб ўтқарсанг,
Қандай бўлар аямажузи?

Ёдга тушар шамдай ҳаётинг,
Лақиллашни бас қилгинг келар.
Ё сандалда қўр бўлгинг, ёки
Тарновларда осилгинг келар...

2011 йил 27 февраль

ҚОРХАТ

Субҳоналлоҳ, оппоқ нур ёғар кўқдан,
Лаҳзада ўзгарар мезон куйлари.
Оқ ятак кийгач ҳам оғочлар ўктам,
Борлиққа ярашиб турар бўйлари.

Аста гулга дўнар шаффоф томчилар,
Севгимиздай нафис, меҳримиздай пок.
Гўё Орзу сари йўллар очилар,
Олдга бошлар ҳассос илоҳий идрок.

Ҳикматлар ўқиймиз оппоқ дунёдан,
Бахтли саҳфаларни очиб бирма-бир.
Сўзлар ярми кумуш, ярми тиллодан,
Олам тўла маъно, олам тўла сир.

Бу қор биринчи ё охиргисимас,
Биздан олдин, биздан кейин ҳам бордир.
Хотималар абас, ҳижронлар абас,
Ҳали ҳаётимиз биринчи қордир.

Шукрона илмини ўргансин юрак,
Ёмғирига шукур, қорига шукур.
Менинг қорхатим ҳам шу эзгу тилак:
Борига барака, барига шукур!

2011 йил 14 ноябрь

Султанлардан келгән бу китепкә үзгәрткән һәм
 «Ахсол» дигән исем белән басылып чыккан.
 Бу китепкә «Ахсол» дигән исем белән басылып чыккан.
 Бу китепкә «Ахсол» дигән исем белән басылып чыккан.

Җытлар

Ахсол китепкә үзгәрткән һәм
 «Ахсол» дигән исем белән басылып чыккан.
 Бу китепкә «Ахсол» дигән исем белән басылып чыккан.
 Бу китепкә «Ахсол» дигән исем белән басылып чыккан.

Бу китепкә үзгәрткән һәм
 «Ахсол» дигән исем белән басылып чыккан.
 Бу китепкә «Ахсол» дигән исем белән басылып чыккан.
 Бу китепкә «Ахсол» дигән исем белән басылып чыккан.



Бу китепкә үзгәрткән һәм
 «Ахсол» дигән исем белән басылып чыккан.
 Бу китепкә «Ахсол» дигән исем белән басылып чыккан.
 Бу китепкә «Ахсол» дигән исем белән басылып чыккан.

...ҚОРҚАТ

Суқи филни қулатар, кўз деган ёмон экан,
Ўтолмайсан баҳридан, юз деган ёмон экан.
Қандоқ қилиб тилимга энди чилвир боғлайин,
Сўз деган ёмон экан, сўз деган ёмон экан...

2008 йил, сентябрь

Сурмишдан келиб, муҳаббатдан кетиб,
Ўн юзга сизни кўриб қолди.
Сизни ёндоқ қараб қўлиб қўлиб қўлиб...

Қандайдир кўриб қўлиб қўлиб қўлиб,
Сизни кўриб қўлиб қўлиб қўлиб,
Сизни кўриб қўлиб қўлиб қўлиб,
Сизни кўриб қўлиб қўлиб қўлиб...

Бу ким?
Бундай била, бундай бундай бундай,
Ушбу ким?
Ушбу ким?

Ширинликдан келиб қўлиб қўлиб,
Билмишдан келиб қўлиб қўлиб,
Милликдан келиб қўлиб қўлиб,
Билмишдан келиб қўлиб қўлиб...

2011 йил 14 сентябрь

АҲВОЛ

Куйиб битдим – нима ўзгарди?
 Қачонгача ўзимни ейман?
 Беҳудага юзим қизарди
 Ё бемаврид келдимми, дейман.

Аҳмоқ қилди гар гапга кирсам,
 Ожизлигим инжиқлик бўлди.
 Маҳмадона чикдим гапирсам,
 Жим турганим писмиқлик бўлди.

Гул чехралар самимий сохта,
 Тўхтаб қолган соатлар бебурд.
 Қололмайман узоқ бу шохда,
 Кетай десам, у томон ҳам мўрт.

2008 йил, сентябрь

МОСЛАШУВ

Ғолиблик қонуни шундай мустаҳкам:

Парвоз олиб чиқар кўкка – Эркюртга.

Ҳеч ким ҳавас қилмас, бургут бўлса ҳам,

Товуқлар ичида юрган бургутга.

2008 йил 22 ноябрь

ОДАМЛАР НИМА ДЕРКИН?

Қўлдан кетмиш ихтиёр,
 Бу дунёда ким эркин?
 Қарғиш урган бир гап бор:
 «Одамлар нима деркин?»

Онам ўшандан кўрқар,
 Отам ухлолмай чиқар,
 Менинг кўнглимни сиқар:
 «Одамлар нима деркин?»

Гап-сўзларга йўқ мажол,
 Юролмайман бемалол,
 Йўлим тўсар бир савол:
 «Одамлар нима деркин?»

Андухлардан дил тилим,
 Боққа кетдик, юр, Гулим.
 Жовдирайди севгилим:
 «Одамлар нима деркин?»

Қўшним тўй деб тўймайди,
 Янги кий деб қўймайди,
 Ўзгармасам бўлмайди,
 Одамлар нима деркин?

Камбағални бой қилган,
 Қўлларини лой қилган,
 Ҳолимизни вой қилган —
 «Одамлар нима деркин?»

2008 йил, октябрь

МАНФААТ

Дунё манфаатдан иборат, балки,
Ким кулоқ тутарди куруқ ўғитга?
Оёғингни ялаб-юлқаса ҳамки,
Суяк ташламасанг, ёқмайсан итга.

Йўлимга беғараз борми кўз тиккан,
Қаламни дўст десам, қонимга ташна.
Билмам, сизга қандай манфаат экан,
Дардимга харидор, ғамимга ошно?

2009 йил, апрель

БЕГОНАЛАР

Ёнимдаги узоқ одамлар,
Юрагимга тузоқ одамлар.

Майли эди, бўлса бегона,
Улар менга қондош, ҳамхона.

Айбим шудир, жиндай феълим чарс,
Бир қўлдан ҳам чиқар экан қарс.

Ачингандай бўларлар тагин,
Осмон менга улардан яқин.

Кўкайимдан кўчириб музлар,
Тушунади мени юлдузлар.

Дардлашаман тун бўйи дилдан
Олис-олис яқинлар билан.

2009 йил 7 январь

...

Ёлгон, ёлгон, ёлгон ҳаммаси,
Фақат иймон, фақат иймон ҳақ.
Ҳар манзилда фано ҳамласи,
Аро йўлда жонинг муаллақ.

Қўллар қисқа, орзулар майиб,
Қонга тўймас армон ханжари.
Нечун олам борар торайиб
Ўсган сари, улғайган сари?

Парво қилма, фарёд айлама,
Кунларингни нурга қондиргин.
Чуқур кетма, ортиқ ўйлама,
Фақат ёнгин, фақат ёндиргин.

2009 йил 31 август

УРТА***

Энди қўлга олганда созим,
 Оғзим куйди, синди овозим.
 Аламига куйлашим лозим,
 Такрор-такрор имкон сўрайман.

Ўз-ўзимга етарми кучим,
 Ҳасрат ғамга бўлолмас ечим,
 Гарчи мисли қиёмат ичим,
 Хотиржам бир иймон сўрайман.

Кимнинг кайфи учун бу ўйин –
 Мағлублари олдиндан тайин,
 Ғолибларга ундан-да қийин...
 Сотилмаган майдон сўрайман.

2009 йил 2 август

Тўғри, зувалада бори муқаррар,
Алқисса, самар йўқ ёқа йиртишдан.
Фақат ор қиламан, этаман ҳазар
Уларга тенглашиб афсус тортишдан.

Ўқситма, руҳимни чўқтирма, Эгам,
Йўлимни тилагим каби оқ қилгин.
Юксак-юксакларга арзимасам ҳам,
Шуларнинг олдида баландроқ қилгин.

2009 йил 26 август

ЎРТАР

Гуссалардан олтин қафас қургандайман,
 Лахча-лахча чўғ устида юргандайман,
 Бу дунёда ижарада тургандайман,
 Толеъ деган қилмас писанд, Машраб бобо.

Енгилгина кўшиқлари ялло-ялло,
 Оёқларнинг остиндаги лойми, тилло?
 Каминанинг тахаллуси чаламулло,
 Тутумим ҳам шунга монанд, Машраб бобо.

Нега келдим манов ғурбат маконига?
 Тутиб бердим ўзимни ғам пайконига,
 Кўзим куйди кириб севги дўконига,
 Жандангиздан олмадим панд, Машраб бобо.

Томиримдан куйлар оқар – сувораман,
 Кўзёшлари завқ улашган фаввораман,
 Ўз-ўзимни авраш билан овораман,
 Кўнглим синиқ, дилим дардманд, Машраб бобо.

Йўл юраман, мўл юраман, йўлим етмас,
 Хирожига на жоним, на молим етмас,
 Йигирма беш йилдан бери қўлим етмас,
 Этагингиз бунча баланд, Машраб бобо?!

2008 йил, октябрь

ҲУКМДАН СЎНГ

Нима бўлса бўлди – ўзимдан кўргум,
Кўнглимнинг этагин ушладим-кетдим.
Токайгача санғиб ортидан юргум –
Майда орзуларни ташладим-кетдим.

Ишонарли эртақ айтмади тунлар,
Аждарларнинг куни битмаган бўлса,
Қайдан уйқу келсин, ҳамон ботирлар
Мурод-мақсадига етмаган бўлса?

Ичимга ёмғирлар ёққани-ёққан,
Ўйнамасман, Ёлғон ноғора чалса.
Кошки, мен чеккага чиққаним билан,
Дунёнинг айвони кенгайиб қолса...

2008 йил, декабрь

МОНШАД

Ҳали ўттизни ҳам қораламадим,
 Тўймадим туйғулар тароватига.
 Бир яйраб гулбоғлар ораламадим,
 Қонмадим ғунчалар латофатига.

Гарчи оғир-вазмин шеър битдим талай,
 Гарчи тафаккурга ён бердим кўпроқ,
 Ҳаётдан фалсафа сўқдим-у тинмай,
 Аммо... юрагимда минг битта жумбоқ,

Ўйладим, жавоби топилмас ҳарчанд,
 Оғизга келганин сўйламади тил.
 Гўдак хаёлларни қилмайин писанд,
 Жиддий ўйлар сари бўйлайверди дил.

Мунғайиб неларни ўйлайман бот-бот,
 Безовта руҳимнинг борми малҳами?
 Енгиллашармиди мен билган ҳаёт?
 Тўлиб қолармиди дунёнинг ками?

Кечанинг ўйлари, бугуннинг ғами,
 Эртанги хаёллар – бари муштарак.
 Ҳали олисдадир умримнинг шоми,
 Барибир, яшашга тўймасам керак!

Барибир, қўймадим ўзни қийнашни,
 Шукурки, сўзларим чиқмас ҳалқумдан.
 Оҳ, мен ҳам биламан ўйин ўйнашни,
 Фақат... уяламан дардкаш халқимдан...

2011 йил 28 - 29 ноябрь

ДАШНОМ

Эй, оғзига кучи етмаган,
Тўғри гапга тиши ўтмаган!
Ноқис дунё яралибдики,
Тоштерарнинг иши битмаган.

Дахмазаю ғавғойингни қўй,
Пуч ёнғоқдай даъвойингни қўй.
Нолиш нарвон бўлолмас кўкка –
Енгил-елли оҳ-войингни қўй.

Бахил боғи янтоқ бўлади,
Илк мушт туккан қўрқоқ бўлади.
Оёғингни ботирмай турсанг,
Шу дарёлар покроқ бўлади...

2009 йил, апрель

Кетинг, эй, даф бўлинг, золим хаёллар,
Кўнглимга тошлардай оғир ботдингиз.
Малоллар келдингиз жонга, малоллар,
Билмам, қачон бунда илдиз отдингиз.

Умримнинг эгови бўлдингиз кўп бор,
Кетинг! Ортингиздан раҳматлар йўллай.
Қанча шаҳло кўзлар йўлимда хумор,
Мен ҳам бир уларга интизор бўлай.

Андак ором олсин саргашта руҳим,
Ҳали манзил узоқ, ҳали кураш кўп.
Ҳозирча ҳасратга ўхшайди оҳим,
Ҳозирча юракда алаҳсираш кўп...

Кейин дўк ураман, қўймайди чўчиб,
Уларга бас келиш – амри маҳоллар.
Оёғимдан тортиб, бўйнимдан қучиб,
Авраб олаверар маккор хаёллар.

2011 йил 30 ноябрь

Балосиз – гүеки ғамимни ейсиз,
Заҳардан ўткирроқ чой бериб қўйиб.
Тортинмай бемалол ўтиринг дейсиз,
Игнанинг учидан жой бериб қўйиб.

2010 йил 14 сентябрь

Аё вужуд, аё пешонам шўри,
Бунча ҳарис, мунча нағмакор бўлдинг.
Наҳот, сенга етмас қалбимнинг кўри?
Дунёлар остида нечун хор бўлдинг?

Ҳар ҳолда, биламан, жонга ишонч йўқ,
Ўлим сари чорлар ҳар нафас, ҳар сас.
Булбуллар сайраган тонгга инонч йўқ,
Олам – ҳикматларга қурилган қафас.

Ўйноқлаб яллолар қилгинг келади,
Яйрамоқдан бўлак ҳеч ташвишинг йўқ.
Ҳаётни бир ўйин билгинг келади,
Хаста кўнглим билан ҳануз ишинг йўқ...

Аё вужуд, аё манглайим шўри,
Неки ўтди сендан – кечирдим, майли.
Узилиб кетмасин руҳимнинг тори,
Кел энди, яшайлик...

2011 йил 11 декабрь

ЧИГАЛ САВОЛЛАР

Дўлга тутилдимми, ёмғирдан қочиб,
Кулфат бу дунёга мангу устунми?
Адашдимми ишққа кўнглимни очиб,
Шеъримнинг иймони бутунми?

Ажрата олдимми кеча, кундузни,
Оқ-қора кунларга бердим ва ё ранг?
Муштарак билдимми япроқ, илдизни,
Мазмунга уйғунми бу оҳанг?

Кўргани бордимми Бахтни бирровга,
Соғинч саҳросида бежиз кездимми?
Нечун олмай қўйди жонни қистовга,
Ҳаётдан қарзимни уздимми?

2011 йил 12 декабрь

Менга зарурмиди шунақа яшаш?!
Қоғозга тўкилиб бормоқда умрим.
Орзулар олдинда, аммо кўнгил ғаш,
Кўзларим, сўзларим ёнаётир жим.

Чопаман ненидир излаган бўлиб,
Топмоқчи бўламан недандир таскин.
Шунчалар узунми йўлсизлик йўли,
Шунчалар ҳақирми одамзод – мискин?

Эйвоҳ, тубанликнинг йўриғи кўпдир,
Бир онда минг имкон майдалашгани.
Аялган кўзларнинг жазоси чўпдир,
Мудом таъқиб этар завол наштари...

Менга зарур эди шунақа яшаш,
Илло, зое кетмас ёниқ сўзларим.
Дардларим давримнинг дардига туташ,
Умримни шамолга сотмас кўзларим.

2011 йил 14 - 16 декабрь

ИЗОҲ

Ўзимни яширдим – ўзимдан қочдим,
Ҳечликнинг бағрида яйрай деб бир оз.
Аммо нелар қилай, нафас олсам ҳам –
Чиқиб келаверди «Мен» деган овоз.

2009 йил 29 январь

Билмайсан ва буни истамайсан ҳам,
Япроқлар тушунди, тошлар англади.
Ҳар томон тарқалмиш – Ер тўла одам,
Нега Тақдир айнан мени танлади?

Бир кунда неча бор туғилиш, ўлиш...
Рух ғолиб келарми ёки Вужуд зўр?
Жонимни тимдалар бўлиниш, сўниш...
Тириклик қадрини мендан сўраб кўр.

Ҳаволар алмашсин, оч эшигингни,
Мен бўлсам бир имкон ахтариб келдим.
Билсайдинг нақадар бахтлилигингни,
Боримни шу Бахтга алишар эдим...

2008 йил 2 ноябрь

Кўзим толди – кутмоқ дарди оғир экан,
Йўлга қараб ўтмоқ дарди оғир экан.
Барига-ку чидаш мумкин, лек ҳар нафас
Ўз-ўзингни титмоқ дарди оғир экан.

2010 йил 2 октябрь

Тамом!.. Бундай юрак ортиқ керакмас,
Осмонга отаман кўксимдан юлиб.
Хурмача қилиғин қилмас экан бас,
Қанча лаззатланди устимдан кулиб.

Ҳар он томирларим ўйнайди ёмон,
Бир бор қулоқ солмас холис сўзимга.
Бошимни кўтарсам, санчиқ беомон,
Тангадай кўринар олам кўзимга.

Ҳеч кимни қошига йўлатмайди-ку,
Такаббур соқчилар қўйган қасрига.
Қандай адолатсиз, золим ҳоким бу,
Косам оқармайди унинг касрига.

Қадами кўкка ҳам кўп оғир ботди,
Ойдаи юлдузларнинг ёрди бошини.
Осмон тутаб, қайта ўзимга отди
Кўксимнинг увада қора тошини...

2008 йил, май

Кундузнинг ризқи бор туннинг ортида,
Кимларнинг бахти бут кимнинг дардида,
Тентираб юрибман сўзлар юртида –
Ҳақиқат аралаш, ёлғон аралаш.

Кунда нафс отига тиларман тўзим,
Гоҳ кўнглим алдайди, гоҳида кўзим,
Қоврилиб ётибман ўзимда ўзим –
Муҳаббат аралаш, исён аралаш.

Узилиб-узилмас ишонч иплари,
Аёвсиз отилар бало тўплари,
Рухимда эврилиш талотўплари –
Эътиқод аралаш, гумон аралаш.

Бўтадай бўзлайман, тойдай кишнайман,
На асал ялайман, на тош тишлайман,
Бирда сарғаяман, бирда яшнаймаман –
Умримда Ҳамалу Мезон аралаш.

2009 йил 20 сентябрь

ДҮСТ

Мени телбаларча кўмсар Ёлғизлик,
Кўзлари йўлимда илҳақ, нигорон.
Уни ҳам ҳар кўйга солар ёрсизлик,
Шуниси ёмон-да, шуниси ёмон.

Нечундир бу ҳолга осон кўникдим,
Кўнглим чопар унинг кўнглин олгани.
Ёнингга бормасам, кечир, севиклим,
Қўрқади Ёлғизлик ёлғиз қолгани.

2008 йил 25 декабрь

У айтади: нодирсан,
Беқиёссан, ботирсан,
Ҳар нарсага қодирсан.

Бу айтади: кимсан сен?
Иллат тўла хумсан сен.
Қўлда турмас қумсан сен.

У шивирлар: тур, бўлгин,
Балиқларга тўр бўлгин,
Зўрлар ичра зўр бўлгин.

Бу пичирлар: ўч энди,
Ҳечдан кўра кеч энди,
Ўз уйингга кўч энди.

У айтади: ўқ бўлсанг,
Бу айтади: йўқ бўлсанг...

2010 йил 16 январь

Бир менми ўзини йўлга қантариб
Икки ўт ичида қоврилаётган?
Бетиним имкондан имкон ахтариб
Бор-йўғи ҳавога соврилаётган?

Оҳларим оҳорли куй каби қуйма,
Умримдан таралган оҳанглар чинми?
Бир менми юраги қиймаю қийма,
Яшагандай бўлиб юрган бир менми?..

2010 йил, январь

Мен ўлимдан қўрқаман ёмон,
Гар Ҳақ сари қадамдир мамот.
Тиним билмас гарчи тирик жон,
Гарчи жуда шафқатсиз ҳаёт,
Мен ўлимдан қўрқаман ёмон.

Топганларим йўқотиқ бўлди,
Йўқотганим топилар ё йўқ.
Кўз ўнгимда қанча кун ўлди,
Тоқатимнинг тоқатлари тоқ.
Топганларим йўқотиқ бўлди.

Ўт кетганда бор жаҳонимга,
Ёмғирмиди кўзимнинг хасми?
Бир жонимга, битта жонимга
Шунча қайғу оғир эмасми?
Ўт кетганда бор жаҳонимга.

Шайтон иси келар шомлардан,
Қани, қўлга тутилиб ўлса.
Кошки, ипи узун ғамлардан
Ўлиб туриб қутулиб бўлса.
Шайтон иси келар шомлардан...

2010 йил 20 - 21 июль

Чигирикдан ўтар ҳар қилмиш,
 Гоҳи ёлғон, гоҳи ростим бор.
 Бисотимда Кўнгил аталмиш
 Душманданам баттар дўстим бор.

Саҳродаги япроқ мисоли
 Қаён эсса эрмак шамолга.
 Ҳаётимга сиғмас хаёли,
 Борлигимни кўмди саволга.

Ваҳоланки, тушунмай хулқин,
 Ўлтирибман раъйига қараб.
 Бир яшнайти, бир куни сўлғин –
 Ўзгаргани-ўзгарган, ё Раб!

Рўпарамда турар эшилиб,
 Кўзёш қилар, гоҳ мушт ўқталар.
 Айниепман унга қўшилиб,
 Изларимда бенур нуқталар.

Куни борми қийнамайдиган?
 Мени абгор этади шу юк.
 Ўз дўстини ўйламайдиган
 Кўнгилшоҳнинг нимаси буюк?

2008 йил 26 октябрь

•••

Ёлғиз гуллаганнинг аҳволи қурсин,
 Биров завқ туймаса, дил боғламаса.
 Борлиқни тутмаса муҳаббат иси,
 Шўх еллар хизматга бел боғламаса...

Менга бу кўкларнинг йўқдир кераги,
 Ўзимдан бошқага келтирмаса бахт.
 Нечун гупирмайди тоғлар юраги,
 Муғанний майсалар нимага қарахт?

Ҳали ҳам боғингиз узра баҳорми,
 Биз томон эътибор ёллаётганлар?
 Ёнингизга қаранг, бирор зот борми,
 Ростдан бахтлимисиз, гуллаётганлар?!

2010 йил 6 октябрь

ATMIZY ANI

Одамга зор бўлиб ўтган кунларим,
Кутмаган кунларим, кутган кунларим,
Умримга ярашиб ётган кунларим,
Мен сиздан розиман, сиз рози бўлинг.

Билмадим ва ёки билмаган бўлдим,
Дунёни назарга илмаган бўлдим,
Тиниб бўлдим, гарчи тинмаган бўлдим,
Мен сиздан розиман, сиз рози бўлинг.

Яхшию ёмонга аталган сўзлар,
Кўнглимни бир қадар кўтарган сўзлар,
Бўғзимга пичокдай қадалган сўзлар,
Мен сиздан розиман, сиз рози бўлинг.

Ҳудами, беҳуда узоқ ўйладим,
Эртакка ўхшамас эртак сўйладим,
Ҳар қанча совурдим – Вақтга тўймадим,
Мен сиздан розиман, сиз рози бўлинг.

Эртамни эслатманг, олманг хавотир,
Ҳар нега қодирдир юрак – баҳодир,
Балки, бу битиклар сўнгги хатодир...
Мен сиздан розиман, сиз рози бўлинг.

2010 йил 8 октябрь

ЯНА ҰЗИМГА

Не учун ўзингни бунча қийнайсан,
Нима бўлар бир бор қўйсанг эгилиб?
Не сабаб узундан-узун ўйлайсан,
Йўлингда жумбоқлар ётар тугилиб.

Нимага узатсанг бормайди қўлинг –
Тутқазган ошини ошайвермайсан?
Нечун калит сўзга айланмас тилинг,
Нега бошқалардай яшайвермайсан?

2009 йил 5 июль

Ҳали оғз айтарман



Ҳақиқатни аниқлик,
 Кели кели нурларини,
 Ҳақиқатни, ушқини,
 Ай келимиз ақлларини

2008 йил 20 апрел / 1-қирғи

Сўз излаб саргардон, сўз ичра зорман...
Гапдон давралардан қочиб кетди тил.
Диққинафас хона, сендан безорман,
Шеър ясаб ўтишга ҳаё қилар Дил.

Ёзганларим сари ортиб борар ғам,
Дардларимни айтсам, нолишга йўйма.
Нопок қадам билан қошинга борсам,
Ҳайда, Адабиёт, ичкари қўйма!

2008 йил, август



МАЙДОН

1

Ойдинда от ўйнатдим,
 Ёнсин-ёнсин юлдузлар.
 Дилбулоқни қайнатдим,
 Ўнгурларда тош музлар.

Доғлар босиб юзини
 Ой ухлар қай қўйинда?
 Нур йўқотди ўзини
 Ҳалол-ҳаром ўйинда.

Ёлгон ётар болалаб,
 Ор аламда қоврилар.
 Ялтир-юлтур шон талаб,
 Кимга қолди давралар?

2

Юрак чиқди қинидан,
 Дунёларга сиғмайман.
 Ўлганимнинг кунидан
 Қўшиқ айтиб йиғлайман.

Кўксингни нур доғласа,
 Ёруғ ният бўлади.
 Йигит ошкор йиғласа,
 Элга уят бўлади.

Ўрнингизни қизғонинг,
 Асли тоза мардларим.
 Уйғонинг-а, уйғонинг,
 Ай полвонча дардларим!

2008 йил 30 март - 1 апрель

НОДЛАМ

Бир кўзимда оташ, бир кўзимда сув,
Икки дарё аро омонат тоғман.
Лаб тегмаган сўзлар – сулудан-сулув,
Аларнинг кўйида даллию доғман.

Пойимда жон сўраб эзилди тупроқ,
Ҳақиқат қўшиғи экан сукутлар.
Сизни тушунаман ўзимдан кўпроқ,
Бошимда ёғолмай турган булутлар.

Билмасам бўлмасди билмаслигимни,
Қандай оғир экан билмаслик илми.
Ё бор этар, ёки йўқотар мени
Сўзларнинг лутфию сўзларнинг зулми.

2008 йил, ноябрь

Биров билиб қолса, кулар устимдан,
Ортиқ сарсон қилиб юрмасдан ўзни,
Кўксимда яшовчи ганий дўстимдан
Сотиб олгим келар энг зарур Сўзни.

2011 йил 3 апрель

Тўлиб кетганида такбирга осмон,
ҳамду сано айтиб турганда тошлар,
дилбузар доғларга келтирса қирон
мангулик қўшигин куйлаган кушлар;

Зулфиқор майсалар, кескир шаббалар
зулматнинг бағрини этганда пора,
изингдан эргашса ёруғ шарпалар,
чечаклар қуёшдай қилса наззора;

Паҳлавон ниҳоллар бўй чўзиб кўкка,
матонат илмидан берганда сабоқ,
муқкасидан кетмай тирикчиликка,
юмшоқроқ бўлишга ундаса тупроқ...

Баридан орттириб нима ҳам дейин,
ҳикматлар уйидир ҳаёт дегани;
шунча ҳайрат, шунча сабоқдан кейин,
уялиб кетасан шеър ўқигани...

2010 йил, ноябрь

... ..

Мен қидирган сўзлар луғатларда йўқ,
 Мен талпинган ҳаёт қайда – билмадим.
 Ўйлаган қиёфам суратларда йўқ,
 Орзулар орзусин писанд қилмадим.

Лаҳзалик умримга беролмай маъно,
 Пардалар нарига сурилмаётир.
 Ўзим бир сиқимча тупроқман, аммо
 Мен излаган дунё кўринмаётир...

2010 йил, март

Ортдан кўп қувдим танноз сўзларнинг,
Ғамзалари олди ихтиёримни.
Камсуқум каломлар – кўзи тўла мунг,
Нечун тортолмади эътиборимни?

Тинмай буюкликка ичади қасам,
Буқаламун дунё – кимнинг такрори?
Қанча ёқай десам, қанча товлансам,
Тўкилиб борадир юрак оҳори.

Ишқилиб, кўчамдан ғафлат ўтмасин,
Хаста овозимнинг чиқмоқда жони.
Кута-кута кўзим очиқ кетмасин,
Туғила қол энди, сўзлар султони!

2008 йил, июль

Бу сўзлар ўзимга ўхшайди менинг:
 Гоҳида кўнгилчан, гоҳида ёвқур.
 Бирининг кўзида мўлтирайди мунг,
 Ёвошгина бири, бошқаси мағрур.

Қайси бири сокин, қай бири шошқин –
 Дарёдай пишқириб тўлқинга дўнар.
 Баҳор ёмғиридай беозор, жўшқин,
 Яна бири олов – чарсиллаб ёнар.

Яхши-ёмонини билдим-билмадим,
 Минг бора масъулман савиясига.
 Умримни бағишлаб хато қилмадим
 Шу мурғак сўзларнинг тарбиясига.

Бу сўзлар бир уни улғайиб, ўсиб,
 Не хаста жонларга дармон бўлгайдир.
 Жаҳолат йўлини мардона тўсиб,
 Энг тоза ҳисларга қалқон бўлгайдир.

Ҳали улар дадил қадам ташлайди,
 Мени элтиб ойдин кошонасига.
 Бу сўзлар яшайди, узо-оқ яшайди,
 Номимни муҳрлаб пешонасига...

2010 йил 22 июнь

...
...
Хали сўз айтарман Ўзга муносиб,
Дунёнинг умрига етар парвози.
Майда гапларимни кетажак босиб
Ичимдаги асл Инсон овози.

2011 йил

ТОЖАН

Адабиёт, кўрсат атаганингни,
Полвон юрагимни солдим курашга.
Куч олай эшитиб алқаганингни,
Йиқилсам, яраб кўй бир ҳол сўрашга.

Биласан, боғингдан гуллар узгум йўқ,
Билъакс, асрай дейман чечакларингни.
Қалбимнинг суратин сохта чизгим йўқ,
Пуч ёнғоқ тўлдирмас этакларингни.

Мен шеър тимсолида бир шер бўламан,
Пойимда янчилгай жаҳолат, бўҳтон.
Берган нон-тузингга рози қиламан —
Ёлғон яшамайман, ёзмайман ёлғон!

2008 йил, октябрь

НАЖОТ

Тақдир қандай тадбир этар эртага?
Кўнглимда муқаддас ният кўқарар.
Ким қўлга ишонар, биров елкага,
Мени эса бир кун сўзлар кўтарар.

Бору йўқлик билан келсам юзма-юз,
Изимдан эргашса қора нуқталар,
Иймоним сўз эрур, амалим ҳам сўз,
Ўшанда ҳам мени сўзлар қутқарар.

2009 йил 30 март

Тушунган тушунди, укмаган укмас,
О, бу сўзлар деб нақ ақлимдан оздим.
Юракнинг буйруғи ҳар доим ҳақмас,
Раҳмон не буюрса, ўшани ёздим.

2012 йил 10 февраль

СҮНГСҮЗ

Қанот қилиб энг учқур сўзни,
Юлдузларни эттириб хиром,
Ҳаммасига чирт юмиб кўзни
Шартта учиш керак – вассалом!

2009 йил, июнь

МУНДАРИЖА

Дунё эски, ташвишлар эски...

«Ташқарига чикдим. Юрагим кўлда...»	4
Уйғониш	5
Узун орзу	6
Бозор	7
Эски ҳақиқат	8
«Учлик»ларим	9
Рол	10
«Нега асли гўзал эмас гўзаллик?...»	11
Жавоб	12
Зов	13
«Шу бир парча кўеш. Тупроқ. Ҳаво. Сув...»	14
«Қолган чақаларни эслагим йўқдир...»	15
«Қош қорайди, ўйчан қисқарди кунлар...»	16

Илдизларим

Ёруғ ният	18
Даъват	19
Довон	20
Ўғил	21
«Эриб оқди дийдамда қорлар...»	22
Ёлғон	23
«Дўстлар, менга бир дўстлик қилинг...»	24
«Онангнинг эгнига камзул бўлмаса...»	25
«Онамнинг онаси ўтди, водариг...»	26
«Гул каби сочилди мен гул тутганлар...»	27
«Армонқизнинг кўзи баттар сузуклашди...»	28
Очилмаган мактуб	29
Мусофир	30
«Ҳали дунё сўтдай оқ эди...»	32
«Сабоғи тугамас мактабдир Ҳаёт...»	33
Ҳавас	34
«Бу қаро дард ёпишди қайдан...»	35
«Бошингизга кўеш тож бўлсин, Ота...»	36

Бир оз шошманг, Вақт жаноблари!

«...чунки кўп нарсадан кўнглимни уздим...»	38
Ҳар кун	39

Осмонда ёзилган шеър	40
Мангу лаҳза	41
«Бир оз шошманг, Вақт жаноблари!..»	42
«Ҳар куни кўксимда кўпкари...»	43
«Ортиқ ушлаб турмай, очиқ осмонга...»	44
«Тонгдан эшигимни чертади ташвиш...»	45
«У ён ўтиб, бу ён ўтасиз...»	47
«Не ҳикмат дилингнинг яролиғида...»	48
«Ғам миршаби ҳар ерда нозир...»	49
«Сергак тортиб қоласан бирдан...»	50
Англаш	51
«Яшайсан де, ўлмайсан деб айт...»	52
Ўкинч	53
«Адо қилди, еб қўйди йўллар...»	54
«Беҳуда чиқиллаб толиқди соат...»	55
Йигирма еттинчи бекат	56
«то ҳануз жумбоққа ўхшайди умрим...»	57
«Кўксим ўзра ҳаво етиб улгурмайди...»	58

Юрагимнинг ярми қаерда?

Нома	60
«Адашган Ишқ суратида елдим дайдиб...»	61
«Севги, о, гуноҳдошим...»	62
«Бундан буёғига бодомлар бедор...»	63
«Кўзларимга ишон, қўлларингни бер...»	64
«Юракка айландим бошдан то охир...»	65
«Севги ёмон, сеvgи дилозор...»	66
«Қўрқмайсизми, тушингизга кирмай қўйсам...»	67
Сас	68
Кўнгил	69
«Сизни яратгандан мени қизғонманг...»	70
«Мен – ўзини сотиб қўйган қул...»	71
Сен	72
Ғалати хобби	73
«Шу кеча эртагин тугатмаса қор...»	74
«Кўзни юмиб севдим, севиб кўз очдим...»	75
Савдойи	76
«Тушингизга кирганим учун...»	77
«Мен сизга бегона бўлмоқчи эдим...»	78
Аччиқ хулоса	79

«Ёлғиз-ёлғиз хаёллар сурдим...»	80
---------------------------------------	----

Таъбир

«Нега ҳолинг паришон?...»	82
Арафа	83
«Бежиз ёмғир бўлганим йўқ-да...»	84
«Бир лаҳза ҳолимга қўймади ўйлар...»	85
«Жаноза ўқилди қанча сатримга...»	86
Таскинлар	87
«Кимнинг ҳузури деб ким сарсон бўлди...»	88
«Дерларки, жангдан сўнг ботир кўпаяр...»	88
«Не учун ҳолимга ачинмайди тил...»	88
«Ҳар кимга ҳам насиб этмайдиган Бахт...»	89
«Ишингиз бўлмаса чекишдан бўлак...»	90
«Ўзингни яхши кўр, одамларни сев...»	91
«Алам қилмай қўйди ҳеч бири...»	92
Таъбир	93
«Китоб бўлганимда, сизга борардим...»	94
«Занжирлар узилса, кишанлар синса...»	95
Ҳаёт	96
Туғилиш	97
«Ҳар лаҳза тийилиш азобига банд...»	98

Тавалло

?...	100
«Чиқиб кетса эди шу иблис қондан...»	101
«Бу хатолар, аччиқ хатолар...»	102
Тавалло	103
«Шу чиркин матоҳга борми учмаган?...»	104
Тақво	105
Қайтиш	106
«Масжидга ўхшаса эди бу дунё...»	107
«Ортиқ жимиб бўлмас, йўқ, жимиб бўлмас...»	108
«Бардош либосининг иплари тиғдан...»	109
«Юборсанг ўзингнинг ёнинга юбор...»	110
Чора	111
«Раҳматингми, заҳматингми бу...»	112
«На бўғдой, на сомонман...»	113
«Мен мингта, эҳтимол, ундан-да зиёд...»	114
«Муҳаббат дегани эҳсондир, асли...»	115

«Тасбеҳ айтаверсам, зикр этаверсам...»	116
«Меҳрининг чашмига ҳўб чанқоқ севдим...»	117
«Раҳматига ихлос айлаб заҳмат чексанг...»	118
«Улардан ном сўраб қанча ялиндим...»	119
«Ҳаддан ортиғини сўрамадим-ку...»	120
Ибрат	121
Майл	122
«Нечун жон шикаста, нечун руҳ беҳол...»	123
«Исён бўлиб исён эмасди бу ҳис...»	124
«Кўксим оғригани-оғриган, ё Раб...»	125
«Кечагина олам мисли жаннат эди...»	126
«Бошга тушганини кўз кўрди яна...»	127
Сўнги ваъда	128

Шамоллар абадий, ёмғирлар мангу

Тоғистон	130
«Бир муддатга китобингни ёп...»	131
«Шамоллар абадий, ёмғирлар мангу...»	132
Қоршеър	133
«Ахир, шу чоққача қаёқда эдинг...»	134
Нашида	136
«Баҳор, юр, онамни борайлик йўқлаб...»	137
«Тўрт девор ораси ҳаёт эканми!»	138
«Уйғониш нақадар гўзалдир...»	139
Кўктўй	140
«Улар кўздан йироқ, кўнгилга яқин...»	141
Ноябрь	142
Моҳият	143
«Уч кундан бери ёмғир...»	144
Шамол	145
«Оққа буркаётир заминни само...»	146
Аёз	147
Қорхат	148

Ўртар

«Суқи филни қулатар, кўз деган ёмон экан...»	150
Аҳвол	151
Мослашув	152
Одамлар нима деркин?	153
Манфаат	154
Бегоналар	155

«Ёлғон, ёлғон, ёлғон ҳаммаси...»	156
«Энди кўлга олганда созим...»	157
«Тўғри, зувалада бори муқаррар...»	158
Ўртар	159
Ҳукмдан сўнг	160
«Ҳали ўттизни ҳам қораламадим...»	161
Дашном	162
«Кетинг, эй, даф бўлинг, золим хаёллар...»	163
«Балосиз – гўёки ғамимни ейсиз...»	164
«Аё вужуд, аё пешонам шўри...»	165
Чигал саволлар	166
«Менга зарурмиди шунақа яшаш?!»	167
Изоҳ	168
«Билмайсан ва буни истамайсан ҳам...»	169
«Кўзим толди – кутмоқ дарди оғир экан...»	170
«Тамом!. Бундай юрак ортиқ керакмас...»	171
«Кундузнинг ризқи бор туннинг ортида...»	172
Дўст	173
«У айтади: нодирсан...»	174
«Бир менми ўзини йўлга қантариб...»	175
«Мен ўлимдан кўрқаман ёмон...»	176
«Чиғириқдан ўтар ҳар қилмиш...»	177
«Ёлғиз гуллаганнинг аҳволи қурсин...»	178
«Одамга зор бўлиб ўтган кунларим...»	179
Яна ўзимга	180

Ҳали сўз айтарман

«Сўз излаб саргардон, сўз ичра зорман...»	182
Майдон	183
«Бир кўзимда оташ, бир кўзимда сув...»	184
«Биров билиб қолса, кулар устимдан...»	185
«Тўлиб кетганида такбирга осмон...»	186
«Мен қидирган сўзлар луғатларда йўқ...»	187
«Ортидан кўп қувдим танноз сўзларнинг...»	188
«Бу сўзлар ўзимга ўхшайди менинг...»	189
«Ҳали сўз айтарман ўзга муносиб...»	190
«Адабиёт, кўрсат атаганигни...»	191
Нажот	192
«Тушунган тушунди, уқмаган уқмас...»	193
Сўнгсўз	194

Ф18

Ф18

Фазлиддин, Беҳзод.

Кутмаган кунларим, кутган кунларим: шеърлар
/ Б.Фазлиддин. – Тошкент: Akademnashr, 2012. –
200 б.

ISBN 978-9943-389-38-0

УДК: 821. 512. 133-1

КБК 84(5Ў)7

Адабий-бадиий нашр

Беҳзод ФАЗЛИДДИН

**КУТМАГАН КУНЛАРИМ,
КУТГАН КУНЛАРИМ**

Шеърлар

Масъул муҳаррир: Маҳмуд САЪДИЙ

Мусахҳиҳ: Марҳабо ЖҮРАЕВА

Бадиий муҳаррир: Феруза НАЗАРОВА

Техник муҳаррир: Хуршид ИБРОҶИМОВ

Нашриёт лицензияси: АИ №134, 27.04.2009

Теришга берилди: 12.03.2012 й.

Босишга рухсат этилди: 22.05.2012 й. Офсет қоғози.

Қоғоз бичими: 84x108 $\frac{1}{32}$. Futuris гарнитураси.

Офсет босма. Ҳисоб-нашриёт т.: 4,44.

Шартли б.т.: 10,5. Адади: 2000 нусха.

Буюртма №17

«AKADEMNASHR» нашриётида нашрга тайёрланди.
100156, Тошкент шаҳри, Чилонзор тумани, 20^А-мавзе, 42-уй.

Тел.: (+998 71) 217-16-77 **e-mail:** akademnashr@mail.ru

«START-TRACK PRINT» МЧЖ босмахонасида чоп этилди.
Тошкент шаҳри, Миробод тумани, 8-март кўчаси, 57-уй.





*Сўз, сўзсиз, мўъжиза.
Дунёнинг юраги У билан уриб
турибди. Кўнглим тўлиб-тошган
пайтлари қозоғ қоралаб қўяман.
Қораламалар йиғилиб-йиғилиб
тўрт тўплам бўлибди.
Яхши-ми-ёмонми, ҳарҳолда,
уларнинг «пешона»сига менинг
номим битилган.
Иккита университетни
тамомладим. Диплом бўйича
халқаро журналистман. Таҳсил,
изланиш давом этаётир –
Фанлар академиясида. Шеър
ҳаётига айланиб бўлган-у,
ҳаётни шеърга айлантириш осон
кечмаяпти. Аммо, айтиб қўяй,
мен учун шоирликдан-да юксакроқ
мавқе бор. Бу ҳақда «шеърый
автобиографиям» гапириб берар...*

behzod-fazliddin@bk.ru



ISBN 978-9943-389-38-0



9 789943 389380